

*ASO LUA, 07 APERILA 2020*

*Na tauaofia le Palemene i le itula e 9:01 i le taeao e tusa ai ma le Poloaiga o Faalavelave Tutupu Faafuasei.*

Tatalo.

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoaofaitulafono.

**MALELEGA MAI LE O LE AO O LE MALO**

**POLOAIGA FAALAVELAVE TUTUPU FAAFUASEI MATAUPU  
105 FAAVAE O LE MALO TUTOATASI O SAMOA**

O A'u, Tuimalealiifano Vaaletoa Sualauvi II, Le Ao o le Malo o Samoa o le atunuu tutoatasi o Samoa. Ina ua uma ona felogonai ma le Kapeneta e ala i le FK 20 Faapitoa 13 ua faamalieina tuutuuga e faapea, o se faalavelave tupu faafuasei mamafatu ua oo mai ai e avea ma ala o le a ono lamatia ai le saogalemu po o le olaga tau le tamaoaiga, soifua maloloina ma le tamaoaiga o Samoa. Ma o lea ua ou faaalua manino atu iinei e faapea: Ua i ai nei Samoa i le tulaga o faalavelave tutupu faafuasei e amata faamamaluina i le Aso 5 o Aperila 2020 seia oo atu i le Aso 2 o Me 2020.

O poloaiga o faalavelave tutupu faafuasei uma na faia ma faamamalu i le Aso 30 o Mati 2020 i lalo o le Poloaiga o Faalavelave Tutupu Faafuasei i le Vaitaimi o le Aso 21 o Mati seia oo atu i le Aso 4 Aperila 2020, e faaaauu pea seia teuteuina pe soloia.

Faia i lenei Aso 3 o Aperila 2020.

**Sainia: Tuimalealiifano Vaaletoa Sualauvi II**  
**O LE AO O LE MALO**

## **MALELEGA MAI LE O LE AO O LE MALO**

**TUSI mo:**

### **Le Fofoga Fetalai:**

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoaio Faitulafono na te iloiloaina ai le Tulafono Tau Faaofi ua faaalua iinei:

1. Tulafono Tau Faaofi o le Faatatauina o Tupe Faaopoopo (Nu.2) 2019/2020.

**TUUIINA ATU** i lou nei Lima i lenei aso 6 o Aperila 2020.

**Sainia: Tuimalealiifano Vaaletoa Sualauvi II**  
**O LE AO O LE MALO**

## **FAAALIGA MAI LE TAITAI O LE MAOTA**

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoaio Faitulafono mo le iloiloaina o le Tulafono Tau Faaofi ua faaalua iinei:

1. Tulafono Tau Faaofi o Teuteuga o le Tulafono o Falepuipui ma le Toefuataiga 2020.

**TUUIINA ATU** i lenei Aso 6 o Aperila i le tausaga 2020.

**Hon TUILAEPa Dr. Sailele Malielegaoi**  
**TAITAI O LE MAOTA**

**FAAMATALAGA FAA-MINISITA A LE AFIOGA I LE PALEMIA  
MA LE FAATAATIAINA O LE FAASILASILAGA O LE  
POLOAIGA O FAALAVELAVE TUTUPU FAAFUASEI**

**FOFOGA FETALAI:** Ou te tapa ma le faaaloalo lau Afioga i le Palemia mo lau Saunoaga Faa-Minisita, faatasi ai ma le faataatiaina o le Faasilasilaga o le Poloaiga o Faalavelave Tutupu Faafuasei.

Ou te tapa ma le faaaloalo lau Afioga i le Palemia.

**Susuga Hon TUILAIPA AUELUA FATIALOFA LUPESOLIAI  
LOLOFIETELE NEIOTI AIONO GALUMALEMANA Dr.**

**SAILELE MALIELEGAOI:** Lau Afioga i le Fofoga Fetalai faapea sui usufono mamalu o le Fono Aoao Faitulafono, tatou te auai faatasi i le faafetai i le Atua na e saunia i leni taeao fou i le maleifua mai ma alafai mai o sui usufono o leni Maota o le Palemene i le lagisoifua lelei.

Faamalo i le tapuaiga a Le Ao ole Malo, le Sui o le Fono a Sui Tofia faapea alii ma tamaitai Faamasino, Ofisa Sili o Pulega o Matagaluega o tatou faatasi ai i leni taeao, na atofa e fonoa ai Tiafau o le malae o le sailigamalo i se tulaga faafuasei faapitoa. Faamalo foi i le tapuaiga a Samoa i ona tulaga faalupea i Aiga ma a latou Tama faapea le usoga a Tumua ma Puleono i Salafai.

Ae a le tapuaiga i le la itu o le vai i le faigamalo a o tatou uso tuofe o Tutuila ma Manua i le tafatolu o le Pulega Faatonu, le Faamasinoga ma Maota e Lua Faitulafono. O paia lava ia e faasino i le Faleagafulu, le nofo a Maopu, Faatui ma Tootoo, ia ae matua lava le tuu i auauna a le Atua ma le latou faanonogamanu mo tatou tagatanuu ma faigamalo a Samoa e lua.

E tuli'a foi i le to pei o upu i le tosua ma le tolesua, e talii foi ae popoe, aua ua faapopo ni aso ua, o aso folau foi e le tuua, aua tatou te momoe pea ma manu e le fati ae sau mala e atiae. Faafetai i le onosai ma le faapalepale i nei ona aso i le fememeai ma le atuatuvaale ua i ai si o tatou atunuu ona o le mala ua aafia ai le lalolagi atoa i le faamai o le Koviti 19. O lo o aafia uma ai foi tatou uma lava i Samoa nei, ae a tatou tama fanau a Samoa o lo o nopiai i atunuu mamao i tiute ma galuega. Tatou faanonomanu ia i le Atua ma lana pule faa-Soifua e pei ona saafi le Tupu o Tavita, "O le Alii o lou leoleo mamoe o ia, na ia faapea ane ai, e ui ina ou savali i le ata o le oti, ou te le fefe lava i se mea leaga, aua o Oe ta te faatasi ma au, o lau lauu ma lou tootoo e faamafanafanaina ai au". O upu o faamafanafanaga i taimi o faigata e pei ona feagai ai ma i tatou ma le lalolagi atoa, nei, atonu ua silia ma le miliona ma le kuata ua mamai i leni faamai oti, ma a o faagasolo le tatou Fono i leni taeao, e afe ma afe tagata o lo o maliluu i tulimanu eseese o le Kelope. Ou te talitonu o se taeao ese leni taeao ese i le talafaasolopito o le tatou Palemene, ma o le a manatua pea ma faitaulia leni taeao i upufai o Malo.

Lau Afioga i le Fofoga Fetalai, e tusa ai ma aiaiga o le Mataupu 105 ma le Mataupu 106 o le Faavae o le Malo Tutoatasi o Samoa, o lo o aiaia ai le mafai e le Ao o le Malo mai lea taimi i lea taimi ona faia ni Poloaiiga, e amata atu nei ona taua o Poloaiiga o Faalavelave Tutupu Faafuasei e pei ona fautuaina ai e le Malo mo le puipuia o le saogalemu o tatou tagata lautele.

Ua malama i ulugalu liaga o le tai e tusa ai ma le faamoemoe o le tatou Malo e pei ona faalauiloa faalauaitetele ai ma amata faamamaluina ai loa le Poloaiiga lenei mo Faalavelave Tutupu Faafuasei mai le aso 21 o Mati 2020. Ma o le a tumau lona faamamaluina mo le umi e 14 aso.

I le fonotaga faapitoa a le Kapeneta na usua i le Aso Gafua 30 Mati 2020, na talanoaina ma faamaonia ai le toe teuteuina ai aiaiga o le Poloaiiga lenei e pei ona amata faamamaluina mai le aso 21 o Mati i le aso 3 Aperila 2020 e aofia ai vaega nei.

1. Vaiaso anapogi ma tatalo mai le Aso Sa 22 Mati 2020 i le Aso Sa 29 Mati 2020 mai le 6 i le taeao seia aulia le 12 i le aoauli.
2. Aiaiga mo femalagaaiga faava o Malo, vaalele ma vaaalalo.
3. Aiaiga mo potopotoga i nofoaga faitetele.
4. Femalagaaiga faalotoifale e aofia ai pasi ma taavale laupasese.
5. Maketi ma faleoloa supamaketi ma taimi faatapulaaina e tatala ai.
6. Aiaiga mo le faatau o oloa i magaala ma tafaala.
7. Aiaiga mo le tapunia le tumau o aoga uma i Samoa.
8. Aiaiga mo falemai, gasegase tausimai ma siigamai.
9. Aiaiga mo galuega a le tatou Malo.
10. Aiaiga mo tiute tauave a le Matagaluega o le Soifua Maloloina.
11. Aiaiga mo tiute tauave a le Matagaluega o Leoleo.
12. Malosiaga faapitoa o Faauluuluga o Matagaluega.
13. Pepa faailoa o le solia o se poloaiiga o faalavelave faafuasei.
14. Aiaiga mo faasalaga pe afai e le usitaia nei poloaiiga.
15. Tofia o le Komiti Fautua ma aiaiga e tusa ai ma le Mataupu 108 o le Faavae.
16. Tualumaga e aofia ai aiaiga nei.
  - (i) Mo le nofo sauniuni mo se tulaga ogaoga mai aua o lenei faamai corona vairasi po o le Koviti 19 ia mafai ona faataatia ese Tulafono o Tualumaga a le Palemene ma le Kapeneta ina ia mafai ai pea ona faia ni faaiuga tatau mo le tatou atunuu.
  - (ii) Mo faaiuga tatau o Poloaiiga, e le taofia ai ni tualumaga faanatinati a le Palemene ma le Kapeneta i lalo o le malosiaga o le Tulafono Faavae aua aiaiga e fesoasoani atu ai i le puipuiga o le tatou atunuu.
17. Faatupeina. O le faatupeina o fuafuaga a lo tatou Malo i lalo o lenei Poloaiiga, e faatupeina mai vaegatupe talafeagai a lo tatou Malo ua aiaia.

E pei foi ona faailoa atu i faaaliga faalauaitetele a lo tatou Malo, o le taeao nei o le a faataatia ai i le Laulau a Fono a le Palemene le Tulafono Tau Faaofi mo le Tala Faatatau Faaopoopo (Nu.2) 2019/2020 o lo o faagasolo nei. O se taimi ona saunoa lea o le Afioga i le Minisita o Tupe ma auiliili le Tala Faaopoopo Lona Lua o Tupe e auga tonu mo le tali atu o le tatou Malo i aafiaga ma puipuiga o le Faamai Oti e pei ona aafia ai lo tatou atunuu ma le lalolagi atoa i le corona vairasi po o le Koviti 19, ma o le auga tonu lea o le tatou tauaofiaga i lenei taeao.

Lau Afioga i le Fofoga Fetalai, ua i ai foi le faamoemoe e le tataua ona umi le tatou tauaofiaga i lenei taeao ona o puipuiga lava mo le saogalemu lautele, aemaise afai o lo o maimoa mai le tatou atunuu, o lo o amanaia foi e le Palemene lenei aiaiga o le Poloaiga ina ia aua ne i nonofo felataai a ia nonofo vava.

I le usitaia o aiaiga o le Mataupu 107 o le Faavae o lo o faapea mai: Afai o lo o usua le Fono Aoaofaitulafono i le taimi o faia ai se Poloaiga o Faalavelave Tutupu Faafuasei, e tusa ai ma aiaiga o le Mataupu 106 o le Faavae, o le a faapea lava ona faataatia loa le Poloaiga i luma o le Laulau a Fono a le Fono Aoaofaitulafono.

Lau Afioga i le Fofoga Fetalai, ou te tulai atu ai ma le faaaloalo, *E faataatia nei i le Laulau a Fono a le Palemene i le taeao lenei le Poloaiga mo Faalavelave Tutupu Faafuasei e pei ona ua toe faaopoopoina aso e 28 e amata faamamaluina mai le Aso 5 o Aperila 2020 seia aulia le Aso 2 o Me 2020.*

I le feagai ai o si o tatou atunuu ma le mala matautia o lenei faamai, ou te momoli ai le faamalo ma le faafetai i le tapuaiga a Samoa aemaise o le faanonogamanu i talosaga ma anapogi, tainane o le tali mai o lo tatou atunuu i alii ma faipule i so o se auala e tataua ai a o alofaiva a tatou fomai ma tausisoifua faatasi ai ma le lagolago a sui o Matagaluega ma Faalapotopotoga Tumaoti ma paaga masani a lo tatou Malo mai fafo o lo o galulue e le aunoa ina ia mautinoa le malupuipuia o si o tatou atunuu mai lenei faamai matautia. Faamalo le galulue, faafetai le onosai ma le faapalepale.

Lau Afioga i le Fofoga Fetalai, o le lafo ma le faaaliga faa-Minisita lea i le mamalu o lenei Maota, ma o le a toe logologo puialii foi lenei Maota, aemaise o le tapuaiga a lo tatou atunuu i se isi faaiuga a lo tatou Malo pe a aulia atu le aso e pei ona ua atofaina mo le faamamaluina o lenei Poloaiga.

Ia manuia tele le Fonousu a le Palemene i lenei taeao fou. Soifua ma ia manuia.

**FOFOGA FETALAI:** Malo faafetai malele.

## MATAUPU FAANATINATI MO TAGATA UMA

**FOFOGA FETALAI:** Ua faafofoga le Maota i le saunoaga manino a le Afioga i le Palemia i mataupu tutoa ua mafua ai ona tatou toe tauaofia faanatinati i le aso. E le toe tauasaina foi i se gagana a le Nofoa le taua o le tatou pitolaau aua le faafofoga tapuai mai a Samoa aemaise o lenei vaitau faigata ma le ogaoga o le faamai ua lutia ai le lalolagi atoa faapea le folauga a si o tatou atunuu i lenei vaitau.

O le mea la lea, ou te tapa le faaluaina o le saunoaga a le Afioga i le Palemia.

*Faaluaina e le Sui Palemia, Minisita mo Punaoa Faalenatura ma le Siosiomaga.*

*Na faamaonia le lafo.*

**FOFOGA FETALAI:** Ou te tapa e tuu mai se lafo ina ia faataatia i le Laulau a le Palemene le Saunoaga Faa-Minisita a le Afioga i le Palemia ma le Taitai o le Maota.

Tulai mai lau Afioga i le Sui Palemia.

## LAFO MO LE FAATAATIAINA O LE SAUNOAGA FAA-MINISITA A LE PALEMIA I LUGA O LE LAULAU A FONO

**Afioga Hon FIAME NAOMI MATAAFA (Sui Palemia):** Lau Afioga i le Fofoga Fetalai ma le paia o le Maota o Samoa ua potopoto, ou te tulai atu e faatu le lafo, *Ina ia faataatia le Saunoaga Faa-Minisita a le Afioga i le Palemia e pei ona saunoa i ai i lenei taeao.*

*Faaluaina e le Minisita mo Pisinisi, Alamanuia ma Leipa.*

*Na faamaonia le lafo.*

## TULAFONO TAU FAAOFI O LE FAATATAUINA O TUPE FAAOPOOPO (NU.2) 2019/2020 – faitauga muamua

**FOFOGA FETALAI:** Tulai mai lau Afioga i le Minisita o Tupe.

**Afioga Hon SILI EPA TUIOTI (Minisita o Tupe):** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau*

*Faaofi o le Faatatauina o Tupe Faaopoopo (Nu.2) 2019/2020 i lona faitauga muamua.*

*Faaluaina e le Minisita o Aoga, Taaloga ma Aganuu ma le Minisita mo Fesootaiga, Faamatalaga ma Fesootaiga Vavave Faaneionapo.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TALA FAATATAU LONA LUA O TUPE FAAOPOOPO 2019/2020  
– faataatia i luga o le Laulau a Fono**

*Na faataatia e le Afioga Hon Sili Epa Tuioti, Minisita o Tupe i luga o le Laulau a Fono le Tala Faatatau Lona Lua o Tupe Faaopoopo 2019/2020 e tusa ai ma Tulafono Tumau.*

**TULAFONO TAU FAAOFI O LE FAATATAUINA O TUPE  
FAAOPPOPO (NU.2) 2019/2020 – lafo mo le faitauga faalua**

**FOFOGA FETALAI:** Tulai mai lau Afioga i le Minisita o Tupe mo le lafo mo le faitauga faalua.

**Afioga Hon SILI EPA TUIOTI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.2) 2019/2020 i lona faitauga faalua.*

*Faaluaina e le Minisita mo Aoga, Taaloga ma Aganuu ma Minisita mo Fesootaiga, Faamatalaga ma Fesootaiga Vavave Faaneionapo.*

**FOFOGA FETALAI:** Tulai mai lau Afioga i le Minisita o Tupe mo lau saunoaga.

**SAUNOAGA O LE TALA FAATATAU FAAOPO'OPO LONA LUA  
O LE TUPE 2019/2020**

**Lau Afioga i le Fofoga Fetalai ma le Mamalu o le Palemene,**

E ia te a'u le ava ma le fa'aaloalo tele, e avea ai a'u e fai ma Sui o le Malo, e tuuina atu i luma o le laulauafono a le Palemene o Samoa le Tala Faatatau Faaopo'opo Lona Lua o le Tupe mo le Tausaga Faaletupe 2019/2020.

### **Lau Afioga i le Fofoga Fetalai,**

E ao pea onaave le faamua ma le faafetai i lo tatou Tapa'au Sili i le Lagi ona o ana faamanuiaga mo Samoa ua mafai ai ona tatou potopoto i lenei taeao e faatino lo tatou vala'auina a o malutia pea Samoa mai faama'i pipisi lea ua aafia ai le tele o Malo o le lalolagi ma ma'imau ai le soifua o le toatele.

O le masina o Tesema o le tausaga na te'a nei sa fofogaina ai i le Palemene le Tala Faaopo'opo Muamua o le Tupe e tali atu ai le Malo i a'afiaga o le fa'ama'i pipisi o le Misela. O gaoiga uma sa faatino e le Malo mai le 6 masina ua tuana'i atu e o'o mai i le taimi nei, o ni fuafuaga faamuamua e faamalosi ai le puipuiga o le atunu'u mai faama'i pipisi aemaise o le vave faafo'isia o le malosi o le tamaoaiga ise tulaga maualuga e peiona ia i muamua.

Ua ese lenei vaitau ua outou soifua ma o matou ola ai, i le feagai ai o Malo uma o le lalolagi ma lu'itau ogaoga e le'i toe vaaia talu mai le taua lona lua o le lalolagi. O a'afiaga o le faama'ipipisi o le KoronaVairasi ua le gata ina lamatia ai le soifua ma le ola o tatou tagata uma, ae ua mautinoa fo'i le tugā ma le ogaoga o aafiaga i le tamaoaiga o le lalolagi.

### **Lau Afioga i le Fofoga Fetalai,**

O Ianuari o le tausaga nei na muai faasalalauina ai faamatalaga i le faama'i pipisi o le KoronaVairasi i le aafia ai o le a'ai tele o Wuhan i Saina. A o vevesi le Malo o Saina e saili se fofu o lenei faama'i aemaise taumafaiga e taofia ai le sosolo fa'aafi o lenei vairasi, e le'i talitonuina e le tele o Malo o le Lalolagi aemaise i latou e iai le tomai faapitoa i faama'I pipisi le ono a'afia ai o le Lalolagi atoa i lenei fa'ama'i.

Ua 4 masina talu ai ona faalauiloaina lenei faama'i ma e le toe po malaē i le tulaga mafatia ua feagai nei ma le lalolagi. Ua ese fo'i le siosiomaga ua avea nei ma aga masani o le soifuaga o aso uma e pei ona faamalosi ai poloaiga a letele o Malo (State of Emergencies) e aofia ai ma Samoa ina ia malupuipua ma faaitiitia le soona pipisi o lenei faama'ioti.

Ua faalauiloaina fo'i e faalapopotoga faavaomalo o lo'o suesueina ma faatulagaina tamaoaiga o atunu'u ta'itasi, le tulaga pagatia ua feagai nei ma atunuu uma o le lalolagi. O le amataga o le tausaga nei sa fuafuaina e 3.3% e ono siitia ai le tamaoaiga o le lalolagi mo le tausaga 2020. Aepeitai, ua toe iloiloaina ma faamauina ai nei le pa'ū i le na o le 2.4% pe maualalo atu fo'i pe a umi ona fa'aaauina pea a'afiaga o lenei faama'i. O le tulaga ua mafua ona o le tapunia o le tele o kamupani gaosi oloa ma faaitiitia ai fefaatauaiga faavaomalo; le siitia o le fuainumera o tagata ua leai ni galuega; tapunia o kamupani tetele e aofia ai kamupani vaalele lea e faamoemoe i ai le tele o isi atina'e; aemaise o le tulaga femoumoua'i o le maketi tau tupe faavaomalo lea o lo'o fesoasoani e faamamaavega i manaoga tau tupe a atunu'u tetele.



### **Lau Afioga i le Fofoga Fetalai,**

O le va'aiga taula'i mo Samoa i lenei tausaga faaletupe, sa iai le fa'amoemoe e fa'atupula'ia le tamaoaiga i le 3.7% ma e una'ia malosi e fonotaga tetele ma taaloga faavaomalo sa fuafuaina e talimalo ai Samoa, fa'atasi ai ma le faatupula'ia o atina'e e gaosi ai oloa mo maketi i atunu'u mamao ma le si'itia malosi o le atina'e o tagata tafafao maimoa mai fafo.

Peita'i ane, ua taofia nei femalagaiga i le tele o atunu'u ma ua leai fo'i nisi ua toe fia tafafao, ona o le popole ina ne'i aafia ma maimau le soifua i le Korona Vairasi. Mo Samoa lava ia, ua matua'i aafia lava le atina'e o turisi, ona o lea ua soso'o mai aafiaga o le faama'i o le misela ma le faama'i mata'utia ua salalau nei i itulagi uma o le kelope. O lona uiga, e le mautinoa pe faataunuaina taligamalo a Samoa sa tatou tapenapena i ai. Ua matauina fo'i isi aafiaga i le tamaoaiga e afua mai i maketi o lo'o tatou faipaaga mo feafaatauaiga, aemaise atunu'u o lo'o galulue ai fanau a Samoa o lo'o manuia ai aiga i tupe faamomoli.

O lea ua toe fetu'una'i ai a tatou fuafuaga mamao ma ua atagia le ono pa'u maualalo o le tamaoaiga o Samoa, ma faaititia i le - (2.2)%. O lenei va'aiga taula'i o lo'o ogatasi lava ma valoaga mo le tamaoaiga o le lalolagi i le taimi nei.

### **Lau Afioga i le Fofoga Fetalai,**

O le faama'i o le Korona Vairasi ua faatusaina e le to'atele o se galulolo ua a'afia ai le Soifuaga Manuia Lautele ma le Tamaoaiga, "**Social and Economic Tsunami**" o atunu'u uma o le lalolagi. E afua lenei faamatalaga ona o le mata'utia tele ma le ogaoga o aafiaga i vaega uma o le atunu'u e aofia ai aiga ma tagata ta'itoatasi, o le Malo ma ana pa'aga, ae faapea foi pisinisi ma kamupani o lo'o faamoemoe ia i le toatele e ala i galuega o lo'o tausi ai aiga faapea lo tatou atunu'u mo auunaga eseese o lo'o latou faatinoina.

O le puipuiga o le saogalemu faapea le lumana'i manuia o so'o se atunu'u e faamoemoe i galuega ma faaiuga talafeagai e faia e ona ta'ita'i i le taimi nei. E iai le talitonuga o lo'o i a'i tatou lava le vaifofo tatou te amata lalagaina ai se faavae mausalī, e malutia ai Samoa ma poupoua'i ai lo tatou tamaoaiga ina ia maua le malosi e lagolagoina ai atina'e faamuamua mo se manuia o tagatanu'u uma.

O le tofa ua a'e i ta'ita'i o le Malo, e tatau lava ona ave le faamuamua i le saogalemu o Samoa, mai mala e ono atia'e mai. O le lelei faatino o nei fuafuaga uma, e faamoemoe i le malosi o le tamaoaiga ina ia mafai ona faaauauina i so'o se taimi le puipuiga malu o si o tatou atunu'u. O lea ua finagalo ai le Malo ia tuu atu le tau'au e fesoasoani i le atunu'u ua mafatia. E leai ni 'oa tatou te maua i lo tatou siosiomaga. E laititi fo'i lo tatou tamaoaiga ma e lamatia gofie i fesuaiga o le tamaoaiga o le lalolagi faapea

a'afiaga ogaoga e tutupu faafuase'i. O lona uiga, e fuafua tatau a tatou tapenaga i le malosi tau tupe a lo tatou Malo, faatasi ai ma fesoasoani o lo'o mafai ona faamatu'u mai e a tatou pa'aga i aiaiga eseese e aofia ai fesoasoani tu'usa'o ma nonogatupe i tu'utu'uga faapitoa ua faamatu'u mai i lo tatou Malo aua lana faasoa i polokalame ma atina'e eseese.

**Lau Afioga i le Fofoga Fetalai,**

O lenei Tala Faatatau Faaopo'opo Lona Lua o Tupe, ua tu'u faatasia ma folasia i se tulaga faanatinati ona o le vave moomia o le faamatu'u atu o vaegatupe e faamalosi ai lo tatou puipuiga mai faama'i pipisi aemaise o se fesoasoani faamama avega e ala i seleni ma auaunaga taua o lo'o moomia e le atunu'u o lo'o pagatia lea ua saunia e lo tatou Malo e tauala atu i lenei Tala o le Tupe Faaopo'opo Lona Lua.

**Lau Afioga i le Fofoga Fetalai,**

E leai se isi e na te silafia le umi o le a'afia ai o le lalolagi i lenei faama'i. Tatou te leiloa fo'i le aso e toe tatalaina ai femalagaiga faavaomalo o lo'o faalagolago ai nisi o atina'e tetele a lo tatou atunu'u.

O lenei tapenaga o se vaega muamua o galuega fa'atino a le Malo mo leisi 3 i le 6 masina o lumana'i, ma e patino i gaioiga talafeagai e fesoasoani ai i le atunu'u i vaega ua ta'ua i lalo:

- Vaegatupe Fa'atauinuina mo Tapenaga ma Galuega Fa'atino a le Vaega o le Soifua Maloloina;
- Fa'amāmā avega mo Vaega Tumaoti;
- Fa'amāmā avega mo Tagatanu'u;
- Vaegatupe mo le siitia o atina'e ma galuega a le Matagaluega o Fa'ato'aga;
- Vaegatupe mo tapenaga a isi Vaega Maoti.

A tuu faatasi lenei polokalame fesoasoani, e tusa ma le \$66.3 miliona tala lona tau atoa. O se vaegatupe telē pe a fua i le na o le 3 i le 6 masina o lo'o faatulagaina ai. O lona uiga, e ia i le vaega lua o lenei fesoasoani ma o le a toe faalauiloa atu e le Malo i le Tala Faatatau Autu o Tupe mo le Tausaga Faaletupe 2020/2021.

**Lau Afioga i le Fofoga Fetalai,**

O lenei fesoasoani, po'o le polokalame fa'amāmā avega o se galuega fai fa'atasi a Matagaluega ma Fa'alapotopotoga a le Malo o le a ou tōlauina atu e fa'apea:

- 1. Vaegatupe Faatatauina e SAT\$20.3 miliona tala mo Galuega Fa'atino mo le Soifua Maloloina i vaega nei:**

- Galuega mo le puipuia ma le tuutiitia o le pepesi o le Korona Vairasi;
- Fausiaina o potu fa'apitoa (negative pressure rooms) e taofia ma tausia ai gasegase o le Korona Vairasi;
- Fausiaina o potu fa'apitoa e taofia ai ē ua masalomia i le Korona Vairasi;
- Nofoga e taofia ma mataituina aitagata malaga mai fafo (Quarantine centres);
- Fa'atinoina o suesuega ma lipoti mo gasegase o le Korona Vairasi;
- Vaila'au ma meafaigaluega mo'omia mo falema'i mo le vaaia ma le togafitia o gasegase o le Korona Vairasi.

**2. Fa'amāmā avega i le Vaega Tumaoti e tusa ma le SAT\$12.5 miliona tala o le a fa'aaluina ai ma e aofia ai vaega nei:**

Fa'amāmā avega a le Faaputugatupe mo le Lumanai Manuia o Tagata – NPF;

- E ono (6) masina e tu'usaunoaina ai le totogiina o saofaga mo so'o se pisinisi i lalo o le vaega maoti o tagata tafafao maimoa mai fafo e aofia ai faletalimalo ma fale'aiga;
- E lua (2) masina e taofia ai le totogiina o lisi i so'o se nofoaga a le NPF;

Fa'amāmā avega a le Fa'alapotopotoga o Fa'alavelave Tutupu Fa'afuase'i - ACC;

- Ono (6) masina e tu'usaunoaina ai le totogiina o saofaga mo so'o se pisinisi i lalo o le vaega maoti o tagata tafafao maimoa mai fafo e aofia ai faletalimalo ma fale'aiga;
- Lua (2) masina e tu'usaunoaina ai le totogiina o saofaga mo so'o se tagatanu'u;
- Lua (2) masina e taofia ai le totogiina o lisi i so'o se nofoaga a le ACC e aofia ai le maketi i Fugalei;
- SAT\$2 miliona tala o le a fa'amatu'u mai e fesoasoani i le Tala Faatatau Faaopo'opo Lona Lua o Tupe a le Malo.

Fa'amāmā avega a le Pulega o Uafu - SPA;

- Tolu (3) masina e taofia ai le totogiina o lisi o pisinisi i luga o uafu uma o le atunu'u;
- Toe fa'aolaina atu le 3 masina o laisene i auaunaga mo le la'uina o oloa i luga o uafu (Stevedoring);

- E 20% e to'esea mai i le tau o auaunaga i luga o uafu (wharfage fees) mo le tolu (3) masina;

Fa'amāmā avega a le Pulega o Malae Vaalele – SAA;

- Tolu (3) masina e taofia ai le totogiina o lisi mo pisinisi uma i le Malae Vaalele e amata mai ia Aperila e o'o atu ia Iuni o le tausaga nei.

Fa'amāmā avega a le Fa'alapotopotoga o Malosiaga Tau Eletise – EPC;

- E 50% o le a tu'uititia ai le tau fa'apitoa mo le eletise a Faletalimalo (reduced Daily Fixed Rates);

Fa'amāmā avega a le Fa'alapotopotoga o Fela'uaiga i le Lauele'ele – LTA;

- O le a faapafala le tau o le lesitala mo pasi ma taavale laiti mo masina o Iuni ma Setema o le tausaga nei 2020, ae fautuaina le fa'auuaina pea o le siakiina ma le pasiaina o taavale i kuata taitasi, ina ia saogalemu mo le atunu'u femalaga'i;
- O le a ave'esea le tau o le sala (late fees) mo e ua tuai ona pasi a latou taavale, ma e aofia ai tagata uma o le atunuu mo lenei faamanuiaga.

Fa'amāmā avega a le Malo e tauala atu i le Matagaluega o Tiute ma Tupe Maua;

- Ua tolopoina i le 2 masina le aso e tatau ona totogiina mai ai lafoga i luga o tupe maua ma ave'esea le tau o le sala (late fees) mo kamupani ma pisinisi ua tuai ona faao'oina atu a latou iloiloga ma lafoga totogi i le Matagaluega;
- Faaopoopoina o oloa uma tau faatoaga ma faigafaiva i le lisi o le fesoasoani a le Malo mo le tuusaunoaina o tiute i lalo o le tulafono 121, poo le Code 121.

Na ona toe faamatala atu, leaga e taua tele le faamama avega lea, o le faaopoopoina o oloa uma tau faatoaga ma faigafaiva i le lisi o fesoasoani a le Malo, mo le tuusaunoaina o tiute i lalo o le Tulafono 121 po o le Code 121. O se faamama avega taua tele mo le aufaifaatoaga ma faigafaiva.

O le fa'amāmā avega a le Malo e tauala atu i le Matagaluega o Tupe;

- Tauaveina e le Malo o le tolu (3) masina o le totogi o nonogatupe mo atina'e i lalo o polokalame o lo'o i'ai le fa'amalugaluga a le Malo ma o lo'o faafoeina i lalo o le Samoa Business Hub;

O lona uiga e 3 masina, i latou o lo o faia nonogatupe nei, o lo o i ai le faamalugaluga a le Malo ma o lo o faafoeina i lalo o le Business Hub. E tolu masina o le a tauave ai e le Matagaluega o Tupe le totogi o a outou nonogatupe.

- Tauaveina e le Malo le totogiina o tului (interest rates) mo nonogatupe uma a le atunu'u lautele i le Faletupe o Atina'e o Samoa mo le lua (2) masina;
- Tolu (3) masina e taofia ai le totogiina o lisi mo pisinisi uma o lo'o fa'atautaia i le Faletupe o Atina'e o Samoa – e faatupe e le Malo lenei fesoasoani.
- E lua (2) masina e taofia ai le totogiina o lisi mo pisinisi i maketi uma a le Fa'alapotopotoga mo Fanua a Samoa (Samoa Land Corporation) i Savalalo, Vaitele ma Salelologa – e faatupeina foi e le Malo lenei fesoasoani;

Faamatuuina atu le \$1 miliona tala e lagolagosua ai i le Kamupani Vaalele a le Atunuu – le Samoa Airways:

- O lenei vaegatupe o le a faamatuuina atu e fesoasoani i le totogiina o pili tuua a le Samoa Airways i ana pa'aga i Samoa nei; a o feagai ai le kamupani vaalele ma luitau i tupe maua, ona o le taofia ai o femalagaiga mo se taimi le tumau;

### **3. Fa'amāmā avega mo Tagatanu'u e tusa ma le SAT\$27.5 miliona tala o le a fa'aaluina ai ma e aofia ai vaega nei:**

Fa'amāmā avega a le Faaputugatupe mo le Lumanai Manuia o Tagata – NPF;

- Toe fa'aolaina, pe faafo'i atu i tagata lautele faisaofoaga o tupe totogi mo nonogatupe mo le masina atoa o Mati 2020;
- Totogiina atu o le 20% o le saofaga atoa mo i latou ua faamalolo mai i galuega i Vaega Maoti o Faletalimalo ona o a'afiaga o le Korona Vairasi i le tamaoaiga. O lenei fesoasoani sa le mafai ona agava'a ai sui faisaofoaga se'i vagana ai ua litaea mai le galuega, maliu, po'o le faamaonia fo'i o le tuua o le atunu'u e le toe fo'i mai.

A o lea ua tatala atu lenei faamama avega ina ia faapea ona fesoasoani atu ai, i le toatele o le aufaigaluega, o Vaega maoti o Faletalimalo, ina ia fesoasoani ai i lenei taimi i le tausiga o tatou aiga.

Fa'amāmā avega a le Fa'alapotopotoga mo Fale a Samoa – Samoa Housing Corporation:

Mo le mamalu o le atunuu o lo o fai nonogatupe mai le Samoa Housing Corporation, po o le Faalapotopotoga mo Fale a Samoa.

- E tolu (3) masina o le a tu'usaunoaina ai le togiina o nonogatupe uma a tagata lautele o lo'o iai i le Fa'alapotopotoga;
- Ono (6) masina e totogi ai na o le 50% o tului (interest rates) i luga o nonogatupe; E i ai le talitonuga, o le toatele o tatou tagata o lo o faia nonogatupe mai le Samoa Housing Corporation, ma o lo o fausia ai o latou fale ma maota i luga o tatou fanua faaleaganuu. O le fesoasoani lea i lo tatou atunuu.

Fa'amāmā avega a le Fa'alapotopotoga o Fela'uaiga i le Lauele'ele – LTA;

- E sefulu pasene (10%) ua faaititia ai le tau e lesitala ai taavale mo le lautele o le atunu'u;

Fa'amāmā avega a le Malo e tauala atu i le Matagaluega o Tiute ma Tupe Maua:

- O le a faapafala le tiute i luga o nisi o oloa o mea taumafa e moomia mo aso uma, e o gatasi ma faamaumauga o lo'o faatulagaina e le Malo;

Ma o nisi o nei mea taumafa, o mea taumafa e le maua ai tatou i le diabetes le ma'i suka faapea le kanesa. O lona uiga, o oloa mo le taumafa e lelei mo le soifua maloloina o le atunuu.

Fa'amāmā avega a le Malo e tauala atu i le Matagaluega o Tupe:

- Faaopo'opoina le \$300 meaalofa tupe faapitoa i le au fai penisione e faaopoopo atu i le \$145 tala mo le masina e tasi; O lona uiga, o lo o maua pea e le au fai penisione le \$145 i le masina e pei ona masani ai. A o lea ua faaopoopo atu i ai ma si faamama aveaga lea e \$300 o le meaalofa tupe faapitoa mo le masina e tasi. O lona uiga, mo le masina lea o le a sau nei, ua le \$145 le tupe e maua atu, ae o le a alu atu le tupe e \$445. O lona uiga o se fesoasoani foi lea aua le tausiga, e le gata i le au penisione ae faapea foi aiga o lo o faalagolago i ai i nei fesoasoani.
- E tolu (3) masina e tauaveina ai e le Malo le 2% o tului (interest rates) i luga o nonogatupe mo tagata uma i faletupe faapisinisi i

totonu o le atunu'u e aofia ai le National Bank of Samoa; BSP Bank; Samoa Commercial Bank ma le ANZ;

O le tasi leni faamama avega e sili ona taua ona o lea ua totogi e le Malo e ala atu i le Matagaluega o Tupe, ia le 2% o le tului o lo o i luga o nonogatupe ia mai tatou Commercial Banks.

- Tu'uitiitia le tau o le eletise i le 10sene ma o le a totogiina e le Matagaluega o Tupe le 7sene ae tauave e le Fa'alapotopotoga o Malosiaga Tau Eletise le 3sene mo le ono (6) masina; O lona uiga e tuuitiitia le tau o le eletise i le 10sene mo le ono(6) masina.
- Tu'uitiitia le tau o le suavai i le 20sene mo le ono (6) masina ma e tauaveina e le Matagaluega o Tupe leni fesoasoani.

#### **4. Vaegatupe mo le siitia o atina'e ma galuega a le Matagaluega o Fa'ato'aga:**

E tusa ma le \$3.5 miliona tala se vaegatupe ua tuuina atu mo le siitia o atina'e ma galuega a le Matagaluega o Fa'ato'aga ma Faigafaiva. O le faamoemoe a le Malo o le una'ia lea o polokalame tau faatoaga ina ia maua pea taumafa mo le atunu'u i taimi uma. E moni o lo o tele le fesoasoani mai o le tatou...aumai o oloa e pei o alaisa, pateta ma tulaga faapena. E le o mailoa e tatou i se taimi o i luma i le faagasologa o leni faamai pipisi, atonu o le a le toe maua mai na oloa. O le mea lena e faataua ai tele le fesoasoani leni e faaauala atu i le Matagaluega o Faatoaga ma Faigafaiva, ina ia faapena ona uunai ia polokalame, i totonu o nuu ma itumalo. Ina ia aua ne i o tatou faalagolago tele i oloa taumafa o lo o aumai i fafo. E tele o tatou fanua e tataua ona toto ai taamu o fai, ulu ma mea faapena.

O se vaega fo'i o leni fesoasoani ia fa'aagaga mo masini ma meafaigaluega a le Fa'alapotopotoga mo Suesuega Faasaienisi a Samoa aua le gaosiina o oloa e pei ole falaoamata, suau'u popo, o le pata margarine ma isi oloa moomia mo aso uma e faaaogaina ai fua o faaeleeleaga o lo'o maua i totonu o le tatou atunu'u.

#### **5. Vaegatupe mo tapenaga a isi Vaega Maoti:**

O vaegatupe mo tapenaga a isi Vaega Maoti e tusa ma le \$2.5 miliona tala ua fa'aagaga mo a latou polokalame e tali atu ai i a'afiaga o le Korona Vairasi. O le a galulue faatasi le Matagaluega o Tupe e faamausali mana'oga ma galuega fa'atino a Vaega Maoti e aofia ai:

- Matagaluega o Leoleo ma Falepuipei, ma Auaunaga mo Faalavelave Tutupu Fa'afuase'i;
- Vaega Maoti o Aoaoga;
- Vaega Maoti o Feso'ota'iga; ma le
- Vaega Maoti mo Galuega fa'atino i nu'u ma alaafaga.

Ou te fia faailoina fo'i nisi o fesoasoani a le Malo mo le atunu'u, e ese mai i vaega ua ta'ua i luga e aofia ai:

- Leai o ni tagata faigaluega a le Malo o le a faamaloloina mai i galuega ona o aafiaga o le tamaoaiga; O lona uiga, e le o i ai se fuafuaga a le Malo, e faapea o le a faaitiitia le aufaigaluega.
- Faatutumuina o avanoa faigaluega uma a le Malo i se taimi vave ina ia maua galuega a le toatele o lo'o saili galuega i le taimi nei;
- Fa'auauina o atina'e tetele a le Malo e aofia ai atina'e tau auala, malae vaalele, ma le suavai ina ia maua ai pea galuega mo le toatele e tausi ai aiga; E pei foi ona silafia, ua i ai le fuafuaga i le taulaga i Salelologa, e fausia ai le fale o le NPF. E i ai le talitonuga, masalo o nai masina o i luma ua faagaoioi ma faatino na mea. O lo o i ai foi fuafuaga a Malu o le Malo ina ia faasee mai Ofisa o Faamasinoga ma fale faamasino faapea Ofisa o Leoleo mai Tuasivi i Salelologa. O galuega faapenei e fesoasoani ina ia faafaigaluega ai tagata ma fesoasoani ai i le tausiga o aiga i lenei vaitaimi.
- Totogiina atu o ni tupe tuua i kamupani ma pisinisi e fesoasoani i a latou tupe maua ma fa'auauina ai ona faafaigaluega le atunuu. Atonu e tasi lenei o faitioga mai le aufaipisinisi, o le tulaga o le o atu o Matagaluega ma Faalapotopotoga faatau mai po o le **catering** po o le faatau mai o oloa, ae fiu nai pisinisi e faatali, ona o le tulaga lea e pei e tuuai i le Matagaluega o Tupe, a o le faiaga lava o i latou i Matagaluega ina ia vave ona faagaoioi. O lo o faatali mai aemaise pisinisi laiti, o tupe ia e toe faaolaola ai pisinisi ma totogi ai a latou aufaigaluega.
- Tapenaga a le Malo ina ia fesoasoani i atina'e e ono faatupula'ia ai le tamaoaiga e auala atu i pisinisi laiti ma e ono faaaogaina ai le Faletupe o Atina'e o Samoa i totonu o le isi tolu masina o lumana'i nei;
- Fa'auauina pea o auunaga tau soifua maloloina e aunoa ma se totogi mo tagata penisione, tina ma'i taga ma fanau e i lalo ifo o le 15 tausaga le matutua;
- Faatuina o le Komiti e mata'ituina tau o oloa (Price Control Board). E taua tele le vaega lea ona o le popolega i lenei taimi, e pei ua pule lava le kamupani ma le pisinisi latou i le fetuunaiga o tau ua faataugata. A o le fesoasoani foi lea ua tuu atu i pisinisi, ina ia taumafai ina ia faapena ona aua lava ne i siitia le tau o nei oloa, e maua ai polofiti ae o le a taugata mo tatou tagata o le a ave i ai lenei faamama avega.



### **Lau Afioga i le Fofoga Fetalai,**

Ou te fiafia fo'i e fa'ailoa atu, feutana'iga sa faia ma o lo'o fa'aauau pea e le Malo e auala atu i le Matagaluega o Tupe faapea le Faletupe Tutotonu o Samoa ma faletupe faapisinisi (commercial banks) i totonu o le atunu'u. Ua mae'a tapenaga a Faletupe o le ANZ, BSP, NBS ma le SCB ma ua amata faalauiloaina fo'i a latou fesoasoani e faamama avega ai i le atunu'u mo leisi 3 masina. E eseese uma aiaiga o nei fesoasoani e fua lava i manaoga o lo'o faailoa atu i le faletupe e tagata ta'itoatasi, pisinisi ma kamupani, aemaise o ana pa'aga ma o se tulaga fiafia mo i tatou uma, le maua pea o le agaga fia fesoasoani o nei faletupe a'o feagai le atunu'u ma mafatiaga i lenei vaitau. Ou te talitonu o lo'o galulue pea faletupe uma nei ina ia mafai ona maua le fesoasoani talafeagai mo a latou paaga i se vaitaimi e le i lalo ifo o le 6 masina.

Lau Afioga i le Fofoga Fetalai ma sui mamalu o le Palemene, avea ia lo'u leo faatauva'a e fai ma sui o le Malo e molimoli atu le fa'afetai i a tatou Pa'aga o lo'o saofagā mai i le atina'e o Samoa aemaise i lenei taimi a o tatou saili fesoasoani solo. E faafetai fo'i i Matagaluega ma Faalapotopotoga a le Malo aemaise o pisinisi tuma'oti ua tu'u mai lo latou tauau e lagolagosua i lenei faamoemoe taua mo le atunu'u lautele. Faafetai, faafetai tele lava.

### **Lau Afioga i le Fofoga Fetalai,**

E pei ona ou ta'ua muamua, o le aotelega o lenei polokalame ua fuafuaina lona tau e tusa ma le \$66.3 miliona. E \$18.2 miliona tala o lo'o fa'atupeina lava e Fa'alapotopotoga i a latou tupe maua masani. E \$9.8 miliona tala le sao o le Malo e ala i ana tupemaua o le a lē aoina mai (foregone revenues) ina ua tu'usaunoina lafoga ma le tau o isi auaunaga mai tagatanu'u. O le vaegatupe o lo'o totoe ai e \$38.3 miliona tala o lo'o tuuina atu mo le faatupeina e ala i lenei Tala Fa'ataua Fa'aopo'opo Lona Lua o le Tupe fa'atasi ai ma nisi polokalame faaopo'opo o lo'o faatupeina ma fesoasoani mai ai nisi o pa'aga masani a le Malo.

A mae'a faatino tulaga uma o lenei polokalame faamama avega a le Malo, o le a fesoasoani lea i le toe siitiaina o le tulaga o le tamaoaiga mai le – (2.2%) i le – (1.6%) ma o se amataga fo'i lea o le tatou savaliga e atia'e lo tatou atunu'u ina ia maua pea e Samoa se siosiomaga saogalemu ma le manuia mo tagatanu'u uma.

### **Tala Faatatau Faaopo'opo Lona Lua o le Tupe:**

O le aotelega o Tupe Alu Faaopo'opo o lenei Tala Faatatau Faaopoopo Lona Lua o Tupe a le Malo, e tusa lea ma le \$47.3 miliona tala ma o le \$8.9 miliona tala e patino i poloketi o lo'o faatupeina a o tatou pa'aga masani. O tupe alu faaopo'opo o lo'o totoe ai e \$38.4 miliona tala o le a faatupeina ai lenei Polokalame mo le Tali Atu i le Korona Vairasi.

O Tupe Maua Faaopo’opo mo lenei Tala Faatatau Faaopo’opo Lona Lua o Tupe e tusa lea ma le \$48.8 miliona tala. Mai i lea aotelega, e \$40.8 miliona tala e maua mai i a tatou pa’aga masani, \$2 miliona tala mai i le ACC fa’atasi ai ma le fa’asiliga e \$6 miliona tala ua mafai ona aoina mai Faalapotopotoga a le Malo mo le totogiina o a latou nonogatupe o lo’o fa’atupeina e le Matagaluega o Tupe e ala i vaegatupe mai Faalapotopotoga Faavaomalo o lo’o tatou faipaaga.

O nei vaega uma e lē o aofia ai le toe fetu’una’iga o tupe alu ma tupe maua ale Malo.

## **TUPE MAUA**

### ***Aotelega o Tupe Maua Faaopo’opo:***

E pei ona faailoa atu muamua, e \$48.8 miliona tala tupe maua fa’aaopo’opo o lenei Tala ile Tupe ae \$12.5 miliona tala le aotelega o tupe maua ua le mafai ona toe aoina mai ona o tiute ma lafoga, aemaise le tau o auaunaga ua faapafala e le Malo e tusa o lana faamama avega i le atunu’u. O le aotelega o Tupe Maua Faaopo’opo mamā (net Revenues) i lalo o lenei Tala Fa’atautu Faaopo’opo Lona Lua e tusa lea ma le \$36.3 miliona tala.

O se oto’otoga lenei o Tupe Maua ua aofia i lenei Tala Faaopo’opo Lona Lua o le Tupe:

#### **1. \$40.8 miliona tala fesoasoani faaopo’opo mai i Pa’aga a le Malo;**

##### **Faletupe o le Lalolagi (World Bank):**

- Teugatupe mo Faalavelave Tutupu Faafuase’i (CatDDO) – \$14,443,301.90:

O le paleni lea o tupe fa’aaga’aga mo faalavelave tutupu faafuasei mo Samoa lea sa tu’uina mai muamua se vaega i le Tala Faaop’oopo Muamua o le Tupe mo le Misela ia Tesema 2019;

- Vaegatupe faapitoa mo le Korona Vairasi (IPF-COVID19) – \$7,084,762:

O se poloketi fa’apitoa lenei a le Faletupe o le Lalolagi e patino i faiga fa’avae ma polokalame e tu’uitiitia ai le mativa ma le lē tagolima fa’atasi ai ma le unaia o atina’e gafataulimaina;

##### **Faletupe o Atina’e o Asia (ADB):**

- Teugatupe mo Faalavelave Tutupu Faafuase’i (Contingency Disaster Facility) – \$8,218,324:

O lenei vaegatupe e tutusa ma le teugatupe o lo’o faia e le Malo i lalo o le Faletupe o le Lalolagi (CatDDO) ma o se fesoasoani mo pa’aga a le Faletupe o Atina’e o Asia mo faalavelave faalenatura.

Ae peitai, ua tatala fo'i le avanoa e saofagāai faama'i pipisi ona o le tulaga mafatia ua feagai nei ma atunu'u Asia i le Korona Vairasi, ma o se avanoa lelei e tatou te tapenapena a'i aua lo tatou puipuiga mai faama'i pipisi aemaise sauniuniga moomia ina ne'i aafia Samoa i le vairasi.

**Malo o Niu Sila:**

- O le malo o Niusila na maua mai ai lea fesoasoani Tu'usa'o (Budget Support COVID19) – SAT\$9,080,553:  
O le fesoasoani lenei a le Malo o Niu Sila e tu'usa'o i le Tala o le Tupe aua tapenaga a le atunu'u i so'o se vaega maoti ua a'afia i le fa'ama'i o le Korona Vairasi.

**Malo o Iapani:**

- Masini ma meafaigaluega mo le falema'i e fesoasoani i togafitiga o faama'i pipisi faapea le misela (Measles/Health Equipments) – \$1,822,374:  
O lenei fesoasoani o se poloketi fa'apitoa a le Malo o Iapani mo masini e ono mo'omia mo le falema'i.

**2. \$8 miliona tala o le a faaopo'opo i Tupe Maua a le Malo:**

**Matagaluega o Tupe:**

- E \$6 miliona tala se Faasiliga i Tupe Totogi mo Nonogatupe a Faalapotopotoga (Onlending Arrangement)  
O lo'o iai nei le fa'asiliga i luga o nei tupe toe totogi mai i Faalapotopotoga a le Malo i luga o a latou nonogatupe o lo'o fa'atupe ma totogi e le Matagaluega o Tupe i paaga masani.
- E \$2 miliona tala se fesoasoani tu'usa'o mai le Faalapotopotoga o Faalavelave Tutupu Faafuasei (ACC) aua le faatinoina o le Fuafuaga mo le tali atu i le Korona Vairasi 2019.

***Aotelega o Tupe Maua o le a tu'uitiitia:***

**E \$12.5 miliona tala o le a tu'uitiitia ai Lafoga o le a lē mafai ona aoina e le Matagaluega o Tiute ma Tupe Maua.**

- O nei lafoga e aofia ai:
  - SAT\$3.2 miliona pe 5% o le a tuuitiitia ai Tuite mo Oloa Faaulufale mai fafo (Import Duty);
  - SAT\$3.6 miliona pe 5% o le a tuuitiitia ai isi lafoga mo oloa faaulufale mai fafo (Imported Excise);
  - SAT\$2.4 miliona pe 5% o le a tuuitiitia ai lafoga mo oloa gaosi i totonu o le atunuu (Domestic Excise);

- SAT\$3.2 miliona o le a 2% tuutiitia ai lafoga VAGST o oloa faaulufale mai fafo (VAGST Imports).

## **TUPE ALU**

### ***Aotelega o Tupe Alu Faaopopo:***

E \$47.3 miliona tala Tupe Alu Faaopopo mo lenei Tala Fa'atatau Faaopopo Lona Lua o le Tupe ae \$2.9 miliona tala Tupe Alu sa fa'aagaga muamua i polokalame faatino a le Malo ua toe fetu'una'i e tusa o lenei polokalame faamama avega mo le Korona Vairasi. O le aotelega o Tupe Alu mamā (net Expenditures) mo lenei Tala Fa'atatau Faaopopo Lona Lua o le Tupe, e tusa ma le \$44.4 miliona tala.

### **1. E \$8.9 miliona tala e faaopopo i lalo o Polokalame o Atinae Faatupeina Faameaalofa (Grants) e Paaga Mai Fafo:**

World Bank IPF COVID19 – SAT\$7.1 miliona

Japanese Government Measles/Health Equipment - SAT\$1.8 miliona.

### **2. E\$38.3 miliona o le a faaopopo i lalo o Polokalame o Tupe Alu a le Malo:**

- **E \$972,410 o le a faaopopo i lalo o le Matagaluega o Fa'ato'aga ma Faiga Faiva**

O nei vaegatupe o le a fa'atupe ai galuega fa'atino ua tapena ai le Matagaluega mo le si'itia ma le va'ava'aia o atina'e tau fa'ato'aga ma lafumanu i totonu o le atunu'u;

- **E \$37.3 miliona o le a tu'uina atu i le Matagaluega o Tupe mo Fuafuaga o le Fa'amama Avega (COVID 19 Response) i le atunu'u:**

O le aotelega o fuafuaga a le Malo mo le tali atu i le Korona Vairasi 2019 o le a fa'aagaga i lalo o le Matagaluega o Tupe e tusa ai ma vaega e pei ona ta'ua muamua.

### ***Aotelega o Tupe Alu ole a toe fetu'una'i:***

### **1. E \$321,816 tala o le a tu'uitiitia ma toe fetu'una'i i lalo o le Matagaluega o Fa'ato'aga ma Faiga Faiva:**

- E iai vaegatupe ma polokalame a le Matagaluega o Fa'ato'aga ma Faiga Faiva ua le mafai ona fa'ataunu'uina i le kuata mulimuli o lenei tausaga ona o le Korona Vairasi ma e auili'ili'ina atu faapenei:

- Ofisa FAO o le Pasefika, lea ua faasao ai le tupe e \$11,835

-Sa faamoemoe e fai se tatou Open Day mo

le au faifaatoaga, ia ua sefe ai le\$20,902  
- Aso Faalauiloa o Faatoaga ua tolopo e  
\$100,067  
- Toe totoina o le Popo, ua faasao mai ai le  
Vaegatupe \$30,081  
- Polokalame atina'e mo le 'Ulu e \$30,000  
- Fonotaga a Minisita (ACP), ua faasaina  
mai le \$28,931

**2. E \$500,000 tala o le a tu'uititia ai le Tala o le Tupe a le Matagaluega o Aoga:**

- O nei vaegatupe sa fa'aagaga mo le Pacific Festival of Arts a o lea ua tolopoina nei i le Tausaga 2021;

**3. E \$2 miliona tala ua tu'uititia ai Tupe a le Ofisa o le Komesina o Faiga Palota:**

- O lenei vaegatupe sa fa'aagaga mo le fausiaina o le Ofisa Fou a le Matagaluega i Mulinu'u. Ae peitai, ua mautinoa lava e le mafai ona faaaogaina uma ia vaegatupe i le isi 3 masina o lo'o totoe ona e le'i ma'ea tapenaga mo'omia mo le talaina i lalo o le fale tuai o lo'o iai nei;

**4. E \$100,000 tala o le a tu'uititia ai le Tala o le Tupe a le Matagaluega o le Va-i-Fafo:**

- O lea vaegatupe sa faatatauina mo le fonotaga a le Pacific Ocean Conference sa fuafuaina mo le masina o Me o le tausaga nei a o lea ua le fa'ataunu'uina.

***Faasiliga o Tupe Alu i Tupe Maua (Budget Deficit):***

O le aotelega o lenei Tala o le Tupe Faaopo'opo, ua matauina ai le fa'atupula'ia pea o le fa'asiliga o Tupe Alu a le Malo nai lo ana Tupe Maua i le \$8 miliona tala, pe tusa ma le 1.7% o le tamaoaiga. O lona uiga o lenei Tala Faatatau Faaopo'opo Lona Lua o le Tupe o le a si'itia ai le fa'asiliga o Tupe alu i Tupe Maua i le 0.5% pe a fa'atusa i le 1.2% sa fuafuaina i le amataga o lenei tausaga faaletupe.

E ui ina ma'aleale ma vaaia tulaga mafatia i le tamaoaiga o le atunu'u, e faamamafa pea sa'u faamatalaga i le taua o lenei fesoasoani e le gata ina malu puihua ai le atunu'u mai le faama'i pipisi o le Korona Vairasi, ae o se auala ua tonu ma talafeagai e toe faataamilo ai le tamaoaiga e ala i le toe fetu'una'i o a tatou polokalame faatasi ai ma le tatalaina atu o faamanuiaga i tagata lautele faapea pisinisi ma kamupani a o feagai ai Samoa faapea le lalolagi atoa ma lenei mala mata'utia.

Sa ou ta'ua muamua, o le amataga lenei o a tatou tapenaga e tali atu ai i a'afiaga i le taimi nei, ae o le a toe fofogaina atu le atunu'u i isi polokalame fa'auau a lo tatou Malo i se aso o i luma. Lau Afioga i le Fofoga Fetalai, o le tulaga ua mautinoa o le Malo ma ana tupe alu o le a uunaia malosi ai lo tatou tamaoaiga mo leisi 3 i le 6 masina o lumana'i.

### **Upu Faaiu:**

#### **Lau Afioga i le Fofoga Fetalai ma le mamalu o le Palemene,**

Talu ai ona o nei luitau maoa'e ua feagai ma le Lalolagi ma si o tatou Atunuu, e talitonu lava le taofi o auala po o alafua o faiga faavae e pei ona folasia faatasi ai ma fesoasoani ua faataatia atu i le aso, o le a lagolago ma fesoasoani tele i o tatou tagata mo le taimi nei.

O tatou o se atunuu, ua molimauina le tele o luitau eseese i tausaga ua alu, ma o loo lagona pea i loto ma agaga le tiga o le faama'i o le misela e le'i mamao atu, ua alu atu ma aveesea ai ni isi o tatou fanau pele, e le gata i lea a o faalavelave faalenatura na aafia ai foi si o tatou atunuu. Ou te tautino atu, o lo o galulue punoua'i pea le Malo faatasi ai ma o tatou pa'aga uma, ina ia puipuia le soifua maloloina ma le soifua manuia lautele o si o tatou atunuu, faapea le sologa lelei o le tamaoaiga mo le taimi nei ma le agai atu i le lumanai.

#### **Lau Afioga i le Fofoga Fetalai ma le mamalu o le Palemene,**

O Samoa o se atunuu e faavae i le Atua, e ao ai ona tatou saili atu i lo tatou Alii mo lana puipuiga e taitai ai i tatou i ituaso faigata faapenei. O lea foi ua toe o se aga ona o tatou taunuu lea i le faamanatuina o le Eseta, o le Malu ma le Toetu manumalo mai o lo tatou Alii Faaola, e ao ai ona o tatou galulue ma tutu faatasi, tuufaatasi o tatou loto ma agaga ina ia mafai ona tatou maua le atoaga o le feau o le Eseta aemaise le soifua maloloina ma le soifua manuia o si o tatou atunuu pele.

Avea ia a'u e fai ma Sui o le Kapeneta ma lo tatou Malo e momoli atu le faafetai i le mamalu o Samoa, mo la outou tapua'iga aemaise o talosaga auā le soifua manuia ma le toafilemu o o tatou tagata a o tatou feagai ai ma lu'itau o faama'i pipisi.

O lo o soifua pea lo tatou Alii, o le Eseta e faamanatu mai ai ia i tatou le togiola o lo tatou Alii. E leai se mea e faigata pe a tatou faatuatua ma o tatou talitonu aemaise lava i lenei taimi, it's a time of hope. E leai se mea tatou te popole vale ai, o lo o soifua lo tatou Atua o lo o silafia mea uma ma o le a fesoasoani ia i tatou

Ia manuia tele le faamanatuina o le Eseta ma ia fa'atasi mai lo tatou Atua Silisili Ese ma o lō tatou fesoasoani Sili fo'i lea, ia Samoa.

Soifua ma ia manuia.

*Na faaalua le agaga fiafia o le Maota i le patipati o latou aao, i le maea ai o le Saunoaga a le Minisita o Tupe i le Tala Faatatau Faaopoopo Lona Lua o Tupe 2019/2020.*

**FOFOGA FETALAI:** Malo faafetai i lau saunoaga i le Minisita o Tupe, mo lau saunoaga i le Tala Faatatau Faaopoopo Lona Lua 2019/2020. Afai tatou te atinae faatasi ma galulue faatasi ma le Alii lo tatou Atua, e leai lava se mea e le taunuu. O le tagata e fuafua tapena ma saili ae faalagolago mea uma i le alofa ma le agalelei o le Atua, e faataunuu ai o tatou faiva alofilima aua le tapuaiga a Samoa. Malo faafetai.

Ou te tapa le Palemia e tusa ai ma le lafo.

### **LAFO A LE TAITAI O LE MAOTA E TUSA AI MA LE TULAFONO TUMAU 133**

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, ou te faaluaina le faafetai a lau Afioga i le Afioga i le Minisita o Tupe, i lana taumafaiga ua taoto nei i lumamea. E le o tafe se suasusu ma le meli i Samoa nei, ae o autaluga ua mafai ona maua, po o le a lava le laititi o se vaega tupe ua mafai ona faavagavaga mo lea vaega ma lea vaega o le atunuu, ia tatou ave le faafetai i le Atua ona o se faamama avega ua mafai ona maua e tali atu ai i mafatiaga o feagai ma lo tatou atunuu.

Lau Afioga i le Fofoga Fetalai ou te faatu le lafo, *Ina ia faataatia ese Tulafono Tumau 133 ma avanoa ai le faasee atu o le Fono Aoaofaitulafono i le tulaga faa-Komiti o le Fono Aoaofaitulafono i le tulaga faa-Komiti o le Fono Aoaofaitulafono (Nu.2) 2019/2020 i le tulaga o Mataupu Faanatinati, faatasi ai ma le iloilo a auiliili.*

*Faaluaina e le Sui Palemia ma le Minisita mo Pisinisi, Alamanuia ma Leipa.*

*Na faamaonia le lafo.*

**FOFOGA FETALAI:** E tusa ai ma Tulafono Tumau 117, o le a see atu le Fono Aoaofaitulafono i lona tulaga faa-Komiti o le Fono Aoaofaitulafono.

**FONO AOA O I LONA TULAGA FAAKOMITI O LE FONO AOA O ATOA**

**TULAFONO TAU FAAOFI O LE FAATATAUINA O TUPE  
FAAOPOPO (NU.2) 2019/2020 – felafolafoaiga i luga o le faitauga  
faalua**

**FOFOGA FETALAI:** Ou te faasilasila atu ua amatalia nei taulumaga a le Komiti o le Fono Aoa Atoa.

Ua faafofoga le Maota i le Lafo ua tauala mai i le Saunoaga Faa-Minisita a le Afioga i le Palemia mo le tagofia o Tulafono Tau Faaofi i lona Tulaga Faanatinati.

E tusa ai ma Tulafono Tumau 33(2), o le faagasologa lenei o saunoaga i le Tulafono Tau Faaofi o le Faatatauina o Tupe Faaopopo (Nu.2) 2019/2020:

O le saunoaga;

1. Afioga Hon. GATOLOAIFAANA Amataga Alesana Gidlow – Sui Usufono mo Faasaleleaga Nu.1 i Sisifo;
2. Afioga TAFUA Maluelue Tafua – Sui Usufono mo Aleipata Itupa i Lalo;
3. Tofa Hon. LAUOFO FONOTE NUAFESILI Pierre Laufo – Taitaifono o le Komiti o le Vaega Tau le Tamaoaiga;
4. Afioga Hon. FAUMUINA TIATIA FAAOLATANE Liuga – Sui Taitaifono o le Komiti o Tupe Maua ma Tupe Totogi;
5. Afioga ALIIMALEMANU Alofa Tuuau – Taitaifono o le Komiti o Tupe Maua ma Tupe Totogi.

E faasilasila atu foi i Sui Usufono uma, ua na o i latou ua taua suafa e saunoa i le mataupu. O saunoaga foi, ia le silia i le 5 minute e saunoa ai le Sui Usufono e toatasi. E le tatau ona silia ma le 60 minute e talanoaina ai lenei mataupu e tusa ai ma le Tulafono Tumau 33(2)(a).

Afai e maea saunoaga ua faatulagaina ae o lo o lava le taimi, ia e ono mafai ona maua nisi avanoa mo nisi Sui Usufono e saunoa ai, ia tausisia la tatou Tulafono Tumau.

Ou te fautuaina foi le Failautusi o le Fono Aoa Faitulafono, ina ia mataitu le taimi faatulagaina mo saunoaga a Sui usufono mamalu e pei ona ou taua.

Ou te tapa lau Afioga i le sui usufono mo Faasaleleaga Nu.1 i Sisifo.

**Afioga Tafua Maluelue Tafua (Aleipata Itupa i Lalo):** Lau Afioga i le Fofoga Fetalai, se faamolemole lau Afioga, e le faalavelavea le saunoaga a lau Afioga, ua ou tu atu o le mea e fia faasao. O au e le sau mai le Itupa i. Ma le faaloalo, pe a e finagalo malie i ai.



**FOFOGA FETALAI:** Ia, malo faafetai. Se o Aleipata o le mea taua. Ia, ou te tapa lau Afioga i le sui usufono mo Faasaleleaga Nu.1 i Sisifo, tulai maia e te saunoa e tusa ai o le mataupu.

**Afioga Hon GATOLOAIFAANA AMATAGA ALESANA GIDLOW (Faasaleleaga Nu.1 i Sisifo):** E muamua ona ou avatu le agaga faafetai i lau Afioga i le Fofoga Fetalai mo le avanoa o lenei itumalo e mafai ai ona avatu ni lagona e tusa ai o lenei Tala o le Tupe Faaopoopo Faapitoa aua foi le faalavelave faafuasei, ta te musu e tau o se mala, o lo o faafeagai ma le tatou atunuu ma le lalolagi atoa.

Ae i lou tulai atu ai lau Afioga i le Fofoga Fetalai, faafetai ua uma ona e totoina le niu e tusa ai ma lo tatou vatapuia ma le Atua o lo o faavae ai Samoa, e maua ai le filemu, maua ai le tofa fetalai, maua ai le tonu o mea e ao ona o tatou agai i ai e faatonutonufolau ai le sa o Samoa e fesoasoani i o tatou taitai. E ao foi ona avatu le agaga faafetai, ua uma ona paepaelago e le Afioga i le Palemia le tatou va feagai ai ma le faafofoga mai a le tatou atunuu, e le gata i Samoa nei ae faapea foi ma le faafogafoga mai a tatou uso a tuaoi i Amerika Samoa. Ma o le a le oo i ai se faamatalaga. Ua e saunoa na o le 5 minute ua tuuina mai mo sui usufono taitasi, ae o le a avatu sao ni manatu e tusa ai ma le Tala o le Tupe ua saunoa i ai le Afioga i le Minisita o Tupe.

Ae le i faia sau faamatalaga lau Afioga i le Fofoga Fetalai, i lou tulai atu ai e fai ma se tasi e tautala muamua i lenei Tala o le Tupe, ua ou manatua ai le tu a Maori foi lea pe a fai le challenge e muamua tamaitai, e muamua tamaitai i luma e pese le pese ma le laulaau foi lea, ona faatoa mafai ai lea ona o atu le vaega lea mulimuli o tamaloloa pe afai ua saogalemu. O le mea la ua pei ua ou faapea ai, ia o lea foi ua amata atu le tamaitai, a ua o atu le malamalama lava, ona faapena foi lea ona lafo mai se faasea i le le malamalama o tamaitai. Ae leai lau Afioga i le Fofoga Fetalai, ua matuai manino le saunoaga a le Afioga i le Minisita o Tupe, ua taliga e fia faalogo lava ua leai se mea e le i oo i ai le tofa fetalai.

Ou te momoli atu lou agaga faafetai i lau Afioga i le Palemia, le Sui Palemia aemaise le Kapeneta. Le lagolagosua foi a tatou Matagaluega Tumaoti, Matagaluega uma a lo tatou Malo, o lea ua faalogologo atu, e leai ma se tasi e le o ositaulaga iinei i le mea lenei. O ni faalavelave tatou te le i fuafuaina ae ao ona tatou faafeagai e tali atu i ai. E maeu le alofa o le Atua e foai mai mea i o outou aao ma o tatou lima. E pei ona saunoa le Afioga i le Minisita, e leai ni mea e tua i ai Samoa, e leai ni minerale, leai ni tatou oa ma ni tamaoaiga pei o atunuu tetele. E toe tago atu lava Samoa o le tele lava e tasi lea e i ai lana paketi ma ana tupe maua ma... o lea foi ua faaitiitia aua ua tele ina le sau foi le tamaoaiga sa tatou faalagolago atu i ai i atunuu mamao. Ua afaina foi nai o tatou tagata o faapea ona afifio i

atunuu mamao. Ua tipi foi tiute e tatau ai ona o le fesoasoani mai lava i si o tatou atunuu i lenei vaitau. O le mea lea e avatu le agaga faafetai. Faafetai. O le taimi lenei o taitai totoa, tofamamao, faautaga loloto ma le popoto mai le Atua e faafoe ai le sa o Samoa ina ia aua ne i goto lo tatou vaa. O lagona i le faafogafoga mai o le atunuu, e leai ma se tasi o i ai se faagaulemalie i le tofa ua faaalua, ua saunoa ai le Afioga i le Minisita o Tupe e fai ma sui o le Afioga i le Palemia ma le tatou Kapeneta ma le Malo e faapea foi le lagolago a Minisita Lagolago i lenei Tala o le Tupe ua opea nei i malae. Ma o le a le toe oo tele i ai se faamatalaga. Na o ni tuualalo lau Afioga.

A o le i oo la sau faamatalaga i ni tuualalo, e fia momoli atu foi le faafetai i le tulai mai o tatou Matagaluega, le Matagaluega o le Soifua Maloloina, lau Afioga i le Tamaitai Minisita ma le Pulega o le Matagaluega, malo le fai o le faiva, le puipuga o Samoa ina ia aua ne i oo mai le faamai i o tatou laufanua ma lo tatou siosiomaga.

Faafetai lau Afioga i le Palemia i le vave ona oo o tatou i le tulaga lea ua taua o le lockdown, e aua ai nei feoai, aua o lea ua molimau mai atunuu mamao, o le auala lena o lea ua toe taofiofia ai le sasao o le faamai ma pei a foliga ai e toe maua se taimi e toe togafitia ai e ua afaina, e ui lava ua tele e ua ave o latou soifua, ae peitai, a na le faia le tulaga lea pei ona i ai nei Samoa, e tele atu ni soifua e aafia ma oo mai ai ma le faamai i Samoa, e le mafai ona tatou gafatia. O le agaga faafetai lena.

E fia avatu foi lou agaga faafetai i a tatou paaga, e faaopoopo atu i le faafetai a le Afioga i le Minisita, faafetai ua maua i le Tala o le Tupe le tele o le fesoasoani o lo o tuuina mai. E ui lava foi o le tele o atunuu i fafo o lo o afaina, a o lea lava o lo o maua mai le fesoasoani mo si o tatou atunuu laitiiti ma le faatauvaa.

**FOFOGA FETALAI:** Malo faafetai. Ou te pai atu ua maea le taimi o le sui usufono.

**Afioga Hon GATOLOAIFAANA AMATAGA ALESANA GIDLOW:** Ia, faafetai i lau Afioga. Se i tope atu lava lau Afioga nai manatu ia e lua. O le taimi o le osigataulaga lau Afioga, e le o se taimi mumaua foi e ositaulaga ai Samoa. E leai foi se loto e faia, o le a le tulaga e saunoa ai le Taitai o le Malo, o lena e fai. A saunoa mai le Afioga i le Taitai e ositaulaga uma e amata atu i le Palemene lenei, tuuitiitia totogi o le Palemene lenei, e leai se loto e faia, leaga tatou te pulupululima faatasi aua le faamoemoe lenei. O le tele o polokalame aulelei ma le manaia lea ua saunoa i ai le tatou Minisita, e le mafai ona nofonono taitai uma o Samoa, taitai uma o Samoa o lo o faafogaga mai le tatou atunuu. O se taimi foi lea sa faatalamalie i le saunoaga a le sui usufono lea mai Anoamaa Sasae, ae masalo e tatau lava ona tuualalo atu, i se taimi e tatau lava ona tilotilo i ai,

e avea lea ma taimi e tuutuu ai i tua le tatou faiga palota ae se i faatino mea ia ua outou finagalo e fai.

Lona lua o tuualalo lau Afioga i le Fofoga Fetalai, o lea ua saunoa i mea o lo o taumafai le Malo e faaitiitia o pasene, ae leai se faalogologo atu i se sao o faletupe ia po o commercial banks e le i matuai manino mai ni a latou fesoasoani i totonu o le tatou gafatia lea ua i ai.

O le tuualalo, ou te lagona o le taimi e tatau ona selesese ai tagata lea o lo o nono ma faatuputupulaia a latou seleni, lea ua leva ona lulu, o le taimi ua tatau ona selesese ai. E leai lava se mea e sau ai le tuualalo, na o lau Afioga i le Palemia aemaise le Kapeneta ma sa outou faaiuga ae avatu le matou lagolago.

Lau Afioga i le Fofoga Fetalai, faafetai tele mo lou avanoa. E faamalulu atu pe a ua umi minute o Faasaleleaga Nu.1 i Sisifo, ia o le naunau mo se sao. Ia manuia tele le tatou Fonotaga, manuia le Eseta. Faafetai.

**FOFOGA FETALAI:** Faafetai. Malo saunoa. Tulai mai le sui usufono mo Aleipata Itupa i Lalo ma Luga.

**Afioga TAFUA MALUELUE TAFUA:** Faafetai, o lena ua manino lau saunoaga. Faafetai lava. E momoli atu alofaaga i lau Afioga mo lou soifua o lena e te malosi, le Afioga i le Palemia ma le Kapeneta faapea foi le paia o sui usufono, le mamalu o le Palemene faapea le tapuaiga a Samoa o lo o faafofoga mai. Ia, e puupuu lava se tala, na o le 3 vaega o le lauga, o le faafetai, o le faitaulaga ma lenei vaitaimi faigata ua tatou i ai tatou te galulue faatasi. O nai vaega ia, ua logo la i tino matagi lelei ae viia pea le Alii o lo o manuia Samoa.

Ua fotupule le faiva o tama, aua o lea ua loma faapea le Palemene i lenei Tala Faatatau o le Tupe. Ma o le auga foi o lenei taeao, e le o na ma se laina, o le vairasi lea po o le Corona Virus lea ua tatou potopoto ai. E momoli atu le agaga faafetai i lenei taeao fou i lau Afioga i le Minisita o Tupe e tusa ma le Tala o le Tupe sa o tatou faalogologo nei i ai. A o au se penisione, o le taimi nei o la e ou te siva taamilo i lou nuu ma pese fiafia po o le a le taimi e taunuu mai ai le \$300. O le vaega muamua lea.

O le vaega lua, a o au o le aufaipisinisi o le aufai taavale laiti o le aufaipasi, ua tatau foi ona tutu mai e laina mai e tutu ma patipati mai ia tatou pe a uma atu le tatou Fono. Aisea? Faafetai i le Kapeneta, faafetai i le Palemia ma le Sui Palemia, manaia le fuafuaga ua i ai. E maeu foi lo outou maemaea ua manaia tele le tulaga ua i ai lo tatou Malo. Fai mai le tasi upu a se tagata atamai, “**Chance favours a prepared mind**”. E tuu avanoa pe lilifa le avanoa i le mafaufau e tapenapena.” E faapena le mea lea e i ai lo tatou atunuu. E faafetai atu ai i le Kapeneta ma le Palemia i le tapenapena, e pei o le mea lea e i ai le faamamaavega, o tapenaga lava. O le manatu la i lenei taeao, ua tele upu i manu ae itiiti i mala. Faafetai foi i le Atua e leai se

tasi ua aafia e oo mai i lenei taimi, o le tatou atunuu. O le vaitaimi lenei pei ona taua e le Afioga i le Minisita o Tupe, o le vaitaimi o le Esoto po o le Eseta. O le a la le agaga? O le Esoto ma le Eseta o le mea lava e tasi. E tutusa lava le maamu ma le... ioe. O le vaitaimi o le Eseta tatou te faitaulaga ai i le Atua. O le a la lenei taulaga tatou te i ai? Ua fiu e sue le fuaiupu o le Ioane e i ai le mea foi lele, “For God so love the world that He gave his only begotten Son.” O le Ioane e 3 f16. E leitioa la o le Ioane e 20 sa ou faitau ai i le taeao. Fai mai la le faaupuga lena, “O le alofa o le Atua ua foai mai ai lona Alo e toatasi.” Ia o lau tala i le atunuu lea e faafofoga mai, afai o outou faafofoga mai, aua e te alofa lava oe na o oe, alofa i lou tuaoi, alofa i lou nuu, alofa i le faifeau, alofa i tagata uma e le o tagolima. E pei ona alofa atu le Malo i le au tai 65 tausaga e tufa atu a outou siaki tai \$300.

O lena la i lenei taeao, ou te manatu au, e manaia le poloaiga lea sa fai muamua a Mose ma le Au Perofeta, oi, a Tuilaepa ma le Kapeneta. O le manaia ia o le poloaiga. Na pau lava lau tuualalo, a toe fai nisi poloaiga, tufa mai ia matou nei o sui usufono, o sui o le HRPP matou te logoina ai foi a matou pulenuu ma nai o matou nuu ma itumalo. A o lenei taeao, se o le taeao lava o le faafetai ma le fiafia, o le taeao tatou te talosaga ai i lo tatou atunuu tatou te ositaulaga faatasi i le Eseta lea ua tatou aulia mai ua le o toe mamao. O le talosaga la lau Afioga i le Fofoga Fetalai. E le i atoa sou minute ae ua fai mai ua uma alii. Se aua le faapena au mea.

Ou te faafetai i le Afioga i le Minisita o Tupe ona o le manaia o le Tala Faatatau o le Tupe lea Lona Lua lea ua tatou i ai nei, e \$60 ma ona tupu miliona ea lea na ou faitau i ai, e \$66 miliona le tau atoa o le tatou paketi, ae \$37.3 miliona lea e matau o lea e alu i le tatou vairasi po o le siama lea e mafua ai lenei Fono.

Ae momoli atu foi le agaga faafetai i a tatou paaga aemaise atunuu sa tolaulau e lau Afioga ua maua mai ai le tatou \$40.8 miliona. O le matua aoga lava o lenei tupe tele e fesoasoani i le tatou paketi.

Ia e mulimuli se tautalaga, e momoli atu le agaga faafetai i le Kapeneta, ia aua foi ne i tuua a tatou galuega fai aemaise o le matou vai o lea o le a lau le 4 masina o lea e fai e le i uma. Ma le isi mea e faaopoopo atu ai, o le matou nuu, e le lelei le reception o le leitio e le maua se TV, ae afai nei la tatou te faamoemoe pe afai ae mai se isi i le siama, ia ua le iloa le mea e i ai matou, o le alo mai a o le vaa pe alo i tai i le motu la e i tai e nonofo ai. Na ona tuualalo atu i lau Afioga i le Palemia se i silasila ane i le vaega lea mo si o matou itumalo.

Ia manuia le tatou Fono. Manuia le faafofogaaga a Samoa ia faapea foi le tapuaiga a Lana Afioga Mamalu O Le Ao o le Malo, Sui o le Fono a Sui Tofia, Tumua ma Pule Ituau ma Alataua, Aiga i le Tai ma le Vaa o Fonoti. Faapea foi Sua ma le Vaifanua, Fofu ma Aitulagi, Tootoo o le Faleula ma le Tama a le Manuatele. Ia manuia lenei aso. Soifua.

**FOFOGA FETALAI:** Malo faafetai saunoa i lau Afioga i le Matua.

Ia, ou te tapa ma le faaaloalo lau Afioga Lauofo, le Taitaifono o le Komiti o Vaega tau le Tamaoaiga. Tulai maia lau Afioga i le Matua.

**Tofa Hon LAUOFO FONOTOE NUAFESILI PIERRE LAUOFO (Anoamaa Sisifo):** Faafetai i lau Afioga i le Fofoga Fetalai o le Maota. O lea ua maea ona e faailo tafailagi e pei o le mavaega nai le Tulafasa aua so tatou sao ia Manuvao i lenei taeao. Malo faafetai. Ua saunoa le Taitai o le Malo i le faamai matautia ua feagai nei ma le lalolagi, ae faafetai i le Atua o lenei e le i maua se faamaoniga ua aafia tatou i Samoa nei. Ia tatou tatalo pea i le Atua ia faapena ona faaauau lana puipuiga mo si o tatou atunuu. O le upu moni lau Afioga ua taua e nisi o Taitai iloga o le lalolagi e faapea o tatou ua tatou feagai nei ma se taua, o se taua ma se fili e leai se tino vaaia, ma e sao ma e faamaoni lea tulaga pe a tatou maimoa atu i le tele o faasalalanga o lo o ua maua nei i televise i tulaga o lo o ua aafia ai le tele o atunuu o le lalolagi. A o se fili foi e le iloa ni tuaoi, e le faailoga atunuu, e le faailoga Ekalesia, e le faailoga tagata foi, e le iloa le eseese o le malosi ma le vaivai, e le iloa le eseese o le matua ma le laitiiti, e le iloa le eseese o le mauoa ma le mativa, e le iloa foi le tagata taualoa ma le tagata e le taualoa.

Silasila lau Afioga i le Fofoga Fetalai i nisi o Taitai o nisi o atunuu o le lalolagi ua osofaia e le fili lenei, ua aafia i le faamai lenei. O le mea lea, i lou lava sui usufono, e taua ai tele Tulafono ma puipuiga a lo tatou atunuu ua faamalosi nei, aemaise lava i le tapunia o le tatou malae vaalele faava o Malo i Faleolo. O le tatou usitaia pea o nei restrictions ua faamalosi e na o le pau lea o le auala e toilalo ai le fili ua feagai nei ma le lalolagi, a o talia e atunuu uma o le lalolagi se vaifofo o lenei faamai. E le faigofie pei ona silafia.

Faafetai i lau Afioga i le Minisita o Tupe, o lea ua faataoto ma fofoga le fesoasoani a le Malo mo le atunuu, aua ua tele le aafiaga o le atunuu i lenei faamai, o le tulaga i le aafiaga o le tamaoaiga. Faafetai o lo o ave le faamuamua i le tapenaga mo le tali atu i le faamai pe a faapea e aafia tatou i le saunia lelei lea o tatou fomai ma tausisoifua po o health workers, ia lava meafaigaluega manaomia pei o masini ma ofu e manaomia po o **protecting gears**. Ia aua ne i o latou aafia ai latou a o galulue e laveai nisi e ono aafia i lenei faamai matautia, aua o latou ia o le tatou laina i luma po o le tatou front line i le taua ma le fili lenei.

Ia e pei ona saunoa lau Afioga i le Minisita o Tupe, e le o mautinoa po o le a le umi o lenei faamai, e le o mautinoa po o le a le umi e tatou te faamalosi ai pea tatou restrictions o lo o i ai nei, aua ua toatele tagata o le atunuu ua malolo mai galuega po ua le atoa foi itula faigaluega, falefaigaluega ua tapunia, aemaise faletalimalo ma isi pisinisi e le gata i

Samoa ae faapea foi le lalolagi. O lona uiga, ua i ai le lalolagi i le tulaga pagatia o le tamaoaiga, **economic slow down**. Ma e taua tele lenei fesoasoani, e faafetai ai i le Malo mo le faaauauina o le tulaga lelei ma le siitia o le tamaoaiga ia aua ne i o tatou pau atu i se tulaga matua faaletonu ma le pagatia. O lona uiga, o lea ua manaomia fesoasoani mo pisinisi ua tapunia, o tagata faigaluega, faafetai o lea ua maea ona tolaulauina e le Afioga i le Minisita le fesoasoani po o le stimulus package a le Malo.

E matau atu ma faalogologo totoa i le folasaga a le Afioga i le Minisita, ua leai lava se vaega o le tatou atunuu e le i oooo i ai le fesoasoani ma le faasoa. Faafetai o lea ua maua tulaga i le tuuitiitia o tului po o interest rates, e le gata i totonu o faalapotopotoga tau tupe a le Malo, ae faapea foi ona oo atu le fesoasoani i tatou financial institutions po o trading banks. Malo faafetai. O le tasi lea fesoasoani tele atonu e ono pau ai le exchange rate ae fesoasoani ai mo oloa e faatauina atu i fafo, aua o lea lava e le i tapunia tatou feoaiga o tatou vaa lauolao. O tulaga lelei ia i lau faalogologo atu ma le matau atu.

**FOFOGA FETALAI:** Malo. Ua maea le taimi o le sui usufono.

**Tofa LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai, e pei lava foi ona silafia pei ona taua tatou te le iloa le umi, ae faafetai o lea ua saunoa le Minisita, o lo o i ai foi nisi fuafuaga mo le Tala Faatatau Autu o le Tupe o lumanai, ia i ai foi nisi fesoasoani, pe a faapea lava o le a manaomia ia fesoasoani pe a tatou oo atu i ai. A o lenei lava tulaga o lo o tatou i ai i le taimi nei, o lou lava lagona, e tatau foi ona tatou fai faaeteete ma fai fuafua ia i ai lava le faautautaga tatau i mea faapenei, ina ia aua ne i tele atu foi aafiaga o le fofo nai lo aafiaga o le mai o lo o taumafai e fofo.

Ae faamauiina foi le faafetai i tatou paaga mai fafo, development partners, le Faletupe o le Lalolagi faapea foi nai isi atunuu fesoasoani mai, ae tatou te manatua foi o lo o aafia foi latou i lenei faamai ma e sili atu le pagatia o lo o i ai.

Lau Afioga i le Fofoga Fetalai o le Maota, e manatu ua uma lou taimi, ae faaoga lenei avanoa e momoli atu ai moomooga lelei mo le Eseta, i le faaiuga o lenei vaiaso, ia manuia tele lenei Fono ma stay safe Samoa. Ia manuia.

**FOFOGA FETALAI:** Malo faafetai saunoa i lau Afioga i le sui usufono mamalu.

Ou te tapa lau Afioga i le Sui Taitaifono o le Komiti o Tupe Maua ma Tupe Totogi lau Afioga i le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA (Palauli le Falefa):** Faafetai i lau Afioga i le Fofoga Fetalai mo le avanoa e fai ai foi se sao i le saunoaga matagofie a le Afioga i le Minisita o Tupe. Faamalo le toa.

Ou te faafetai foi i le Kapeneta ona o lo outou fitaituga i lena 3 po o le 4, ua atoa nei le 3 masina e afua mai lava i le faamai pipisi o le misela, e le i maua sa outou malologa. Faafetai i le tatou Malo i le tulaga o le fetuutuunai o le tofa ma le faautaga ua mafai ai ona tatou talanoaina lenei aofaiga o le tupe i tulaga e aafia ai lo tatou tamaoaiga. O le mea lava ou te fiafia ai, ua sii mai le pasene o le deficit mai le 0.5 % i le 1.2 %. Faamalo le faautaga tatau. E manaia lava pe a siisii pea i luga leaga e taua le soifua o tagata.

O le tali atu a le Malo i le faamai o le Covid 19, lea ua faaaluina ai le tupe e \$20.3 miliona. O le lagolagoina o le vaega tumaoti, pisinisi tumaoti, lea e alu ai le \$4.4 miliona. Na pau lava lau tuualalo i i lau Afioga i le Minisita o Tupe faapea foi le Kapeneta, se i siaki nai tagata nei po o la e lava e faigaluega, ne i avatu fesoasoani nei ae o la e lava e faamalolo. O latou nei o lea tatou te faalagolago i ai aua a lelei le tamaoaiga o i latou nei, ia, e le o e aisi pe o foi e faatupu ni faalavelave e ono maua ai ni mea e tausii ai o latou aiga.

O le isi foi vaega ua faafetai ai i le Kapeneta ma le faaiuga e tatala ai nai faleaiga ia e fai i luma o faleoloa. O nei tagata, o pisinisi foi e le o ni pisinisi e... o la e foi e faalagolago i nai a latou small loans, na taofi loa ona afaina foi lea o a latou repayments i faletupe, ae faafetai o lea ua avanoa lea...o le mea lena o lau tatalo lena i le lagolagoina o le private sector. O le lagolagoina e tagata nuu faamalo le toa, e \$7.7 miliona ua faaaluina ai. Faafetai i le Kapeneta lau Afioga i le Palemia le Kapeneta ma lenei Palemene, oka se lagolagosua i le atunuu pagatia. O lea na saunoa le Afioga i le Palemia i le tala foi lea a Tavita i lana Salamo e 23. “E ui lava ina ou savali i le vanu o le ata o le oti ou te le fefe lava i se mea leaga aua o le Atua e faatasi ma i tatou”. E ese le manatu faapito o le Atua ia Samoa, po o le a lava afa e o mai, e aveese, o mai faamai, aveese, aisea? Leaga ua tausisi lava Samoa o le Atua lona Faavae. O le **Food security** lea e faatulaga ai le \$3.5 miliona, o le vaega lea e tatau ona tatou aputi ma aputi pea tatou lagolago ia tatou faifaatoaga ma i latou o e fagotaina le gataifale.

I le **multi-sector supports** a i ai le \$2.5 miliona na aumai i le Supplementary leamuamua, o lau fesili la. Po o le \$2.5 miliona na lea o le faaopoopoga lea i le vaega lea e lagolago ai i le Private Sector. Ma o le **bulk** lena o le tatou tupe, o lo o faaaluina e \$38.3 miliona i lalo o fesoasoani tuusaomai ia tatou Faalapotopotoga, lea e maua ai le \$18.2 miliona, faamalo galulue ia te outou le malosii o le Malo, Matagaluega Faalapotopotoga tumaoti, malo fai o le faiva. Faamanuia le Atua i o outou faiva. E le faigofie, ae tatau ona o tatou galulue faatasi. O tupe maua e

faapafala lea ua \$9.8 miliona, o le lauga faaii lau Afioga, malie lau Afioga se i faauma atu le mea lea, e i ai nai motugaafa. E \$9.8 miliona tupe ia ua faapafala, ona o le fesoasoani ia Samoa. E i ai lau tuualalo, o lau tuualalo, e manaia pe a faaoga le avanoa lea, e amata ai ona fai **out stations**, e faigaluega mai ai tagata i o latou fale. E tele mea faasaoina a le Malo, e faasaoina le **tear and wear** o aseta a le Malo, faasaoina le eletise, faasaoina le vai, faasaoina le **tear and wear** o mea o i ai i le taimi lenei. Pe le o le taimi lea e tataua ona tilotilo ai i tagata o la e galulue i sector, e manaomia i aso uma le latou contribution.

Faafetai i lau Afioga i le Fofoga Fetalai, mo le taimi ua faamaea i i, faafetai mo le sao o Palauli le Falefa. Faafetai i lau Afioga i le Palemia, Kapeneta ma le Palemene. Soifua.

**FOFOGA FETALAI:** Malo faafetai. Talu ai ona o lea ua tatou taunuu i le tatou malologa masani, o le a saunoa le Taitaifono o le Komiti o Tupe pe a taliu mai le tatou Palemene mai la tatou malologa masani, ma faaii ai saunoaga e tusa ai o le Tala Faatatau Faaopoopo (Nu 2) o le Tupe.

*Na faataatiaese Taualumaga a le Fono Aoaofa Fautulafono mo lana malologa masani i le itula e 10.50 ma toe amatalia i le itula e 11.27 i le taeao.*

**FOFOGA FETALAI:** Ou te faasilasila atu ua toe amatalia Taualumaga ma Galuega a le Fono Aoaofa Fautulafono. Malo le onosai, malo foi le faatoatoa i le tatou galuega. E manatu ua maua le faasilagamalosi e faaauau ai la tatou Fonotaga.

E faia le malologa ua maea ona saunoa le sui usufono mo Palauli le Falefa, o le Sui Taitaifono o le Komiti o Tupe Maua ma Tupe Totogi. Ua oo mai le faasologa i le Taitaifono o Tupe Maua ma Tupe Totogi, le afioga ia Aliimalemanu le sui usufono mo Alataua i Sisifo.

**Afioga ALIIMALEMANU ALOFA TUUAU (Taitaifono o le Komiti o Tupe Maua ma Tupe Totogi):** Lau Afioga i le Fofoga Fetalai, faafetai o lea ua maua le faasilagamalosi ina ua maea le taliga o le sua. Ae manatu le Alataua i Sisifo, o lea ua maea ona fiti faamataafa le faamoemoe mo la tatou galuega mo lenei aso, e ala i sui filifilia e saunoa i le Tala o le Tupe. O lea e manatu ai, e ao lava ona ta malamala lo tatou sa, ma galulue faatasi le tuulau ma le avelau, ina ia ogatasi le futia ma le umele i le tulaga tau tupe, aua galuega faatino faapea le mamalu o le atunuu ua afaina i le coronavirus.



I lou tulaga faa-Taitaifono i le Komiti o Tupe, e ao pea ona avatu sina aotelega e pei ona folasia. Aua e matau atu, o la matou Tala o le Tupe, aua o lea ua matou itu ma le Afioga i le Minisita o Tupe. O le aotelega o Soifua Maloloina e \$20.3 miliona, Vaega tumaoti e \$12.5 miliona, o le faamama avega mo tagatanuu e \$27.5 miliona. Matagaluega o Faatoaga e \$3.5 miliona, vaegatupe mo tapenaga a isi vaega tumaoti, e \$2.5 miliona lea e maua ai le aofaiga e \$66.3 miliona e pei ona sa folasia e le Minisita o Tupe. O lea e matau atu, e faatupeina e Faalapotopotoga le \$18.2 miliona ae o le isi \$9.8 miliona le sao o le Malo e maua ai le \$28 miliona, o le eseese lea e \$38.3 miliona, lea e i ai le Tala o le Tupe lea ua opea nei i le Maota le Tulafono. Ma o le aotelega o Matagaluega o Tupe, o le aafiaga o le faamai o le coronavirus lea e \$37,370,122 ma le Matagaluega o Faatoaga ma Faigafaiva, e \$972,410 lea e maua ai le \$38,342,532 e pei ona i ai i le Tala o le Tupe ua tuuina mai.

O le masani a tatou i Tala o le Tupe o le faamamafa o mea e mananao i ai le mamalu o le atunuu, e pei o auala galue, o vai, o aoga. Ae talitonu e ese ai le Tala o le Tupe lenei, o le Tala o le Tupe faapitoa lenei, ma o le faaunauga lava o lenei Tala o le Tupe i le manatu faa-Taitaifono o le Komiti o Tupe. O le faatauana po o le faaamautu o tatou tagata ina ia soifua e aunoa ma le faalagolago i nisi o mea sa masani ai. Malo i lau Afioga i le Minisita o Tupe le faasoa, e pau lava le tuualalo e tulai mai. E pei ona saunoa se tasi o sui usufono, o lea ua manino le faamama avega mo pisinisi o lo o faa-faigaluegaina le toatele o tagata, o lo o faamoemoe i ai o latou ola i tupe ia i aso fai soo. Pe o le a se fuafuaga ma feutagaiga ma ia pisinisi, i le toe faa-faigaluegaina o nai tagata ia. O le tulaga ua tulai mai, ua avea lo tatou matamata i le Televisi i aso uma, i mea o lo o tutupu i isi atunuu i le faamai o le corona virus, tatou te matau ai foi le aofai o tupe o lo o faamautu e isi Malo e fesoasoani mo latou tagata. E lelei leaga foi i se isi itu. Leaga a tatou faalogo i tupe o lo o faamautu e isi atunuu, e faitau miliona ma miliona. Ona tupu ai lea o lo tatou ola faatusatusa i atunuu tetele. Ma tatou faapea ane, e le lava le fesoasoani o lo o tuuina atu, ma e ao pea ona tatou manatua, ma o le faamanatu foi lava lea. O Samoa o le atunuu e faamanuiaina, e pei ona saunoa le tele o sui usufono, ma le faamanatu pea ia i tatou e maaleale si o tatou tamaoaiga. Ma e fuafua foi le Tala o le Tupe i le malosi tau tupe a lo tatou Malo. O le aotelega la o se manatu, i le tulai mai o le faaiuga o le aotelega o le Tala o le Tupe lea, lea e tulai mai ai le \$6.8 miliona le tupe pau, po o lea la ua oo atu ai i le \$68.8 miliona tupe pau mo lenei tausaga faaletupe, ina ua tuu i ai le Tala o le Tupe lona lua lenei. O le fiafiaga ona o lea e matau atu, o lo o i le va pea o le 35% i le 38% o le tamaoaiga le aofai o tupe faaalu masani e pei ona i ai a tatou aiaiga po o faiga faavae mo a tatou Tala o le Tupe. O lea foi o lo o faatumauina, e ui e pei e tele le fuainumera \$68.8 miliona le tupe pau, ae o

lo o faatumauiina pea i lalo i le 2% le tamaoaiga o le faasiliga o tupe faaalu nai lo tupe maua.

O le aotelega lau Afioga i le Fofoga Fetalai, e lagolagoina le Tala o le Tupe ma avatu ai le faamalo ma le faafetai. Manuia le Fonousu a Samoa, manuia lenei aso. Faafetai.

**Tofa Olo Fiti Afoa Vaai:** Lau Afioga i le Fofoga Fetalai....

**Susuga Hon Laauli Polataivao Leuatea:** Lau Afioga i le Fofoga Fetalai finagalo malie pe maua se avanoa.

**FOFOGA FETALAI:** Malie ona o le tatou Tulafono Tumau, o faiga faavae o le tatou galuega, i a tatou mataupu ogaoga faanatinati ua mafua ai ona faapena ona tatou see atu i lenei tulaga. E le tupu soo ae ua faapena ona tupu foi muamua. Ae faamanatu atu i le sui mamalu o lo o faapena ona tutulai mai e fia saunoa. Ou te faamalulu atu, ua maea ona saunoa sui usufono i le tulaga tau tupe ma le tamaoaiga o Samoa e faatatau i le Tulafono Tau Faaofi o le Faatatauina o Tupe Faaopoopo (Nu 2) 2019/2020.

Lau Afioga i le Minisita o Tupe, e i ai se mea e te fia saunoa ai, e talifuaitau i mea sa laga e sui mamalu. Ou te tuuina atu le avanoa lenei e saunoa ai.

**Afioga Hon SILI EPA TUIOTI:** Faafetai i lau Afioga i le Fofoga Fetalai mo le avanoa. E masalo e leai ni mataupu na lagaina, ona e talitonu ua manino le auiliilina o le tatou Tala o le Tupe Faaopoopo faapea foi le tatou fesoasoani atu i lo tatou atunuu, e le gata i pisinisi, o latou e le o toe maua ni galuega faapea foi le au penisiona. O le agaga lava latou ia e fia momoli atu le faafetai tele i sui usufono sa saunoa e avea ai latou ma sui o le tatou Palemene. Faafetai foi le lagolago mai. E pei ona taua, e le o ma iloa e i tatou po o le a le umi o lenei faamai. E pei foi ona taua, e le nofonofo ai le Matagaluega o Tupe i le vaavaai pea i ai ma tapenapena. A faapea e i ai nisi suiga e tatau ona fai, e toe faaopoopo le tatou **stimulus package** o le a faapena ona tuuina mai i le taimi o le Tala Faatatau Autu o le Tupe i le tausaga oi luma. E pau lava se manatu o le tulaga foi lea...e tele ina faitio foi nisi ona o le tulaga faapea o le tele o le malaga soo o Minisita ma Ofisa Sili o Pulega ma nisi foi o le Malo i atunuu i fafo. E manino lava i le tulaga foi i le Tala o le Tupe ma le naunau mai o a tatou paaga e fesoasoani mai i le faatupeina o tatou polokalame ma tulaga faapena. O le taua lea o le tulaga o le tatou nonofo fesootei ma a tatou paaga aemaise lava i le Faletupe o le lalolagi le World bank faapea le ADB faapea isi o le IMF ma i latou na, i le taua o le fesootei ma tatou faatalanoa i ai, vaai mamao i le tulaga o a atinae lelei ma taua e tatau ona fesoasoani mai ai latou ina ia

faapea ona faaauau pea le atinae o le tamaoaiga, maua galuega ma fesoasoani atu ai i lo tatou atunuu. O le mea moni lava o le faiga lea ma tatou paaga ua mafai ai ona fesoasoani mai, ma e ese mai ai i fesoasoani ua uma ona tuuina mai lea ua faatupe ai le tatou stimulus package i lenei vaitaimi, a o lo o faapena foi ona tapena mai ma talatalanoa po o a nisi fesoasoani tatou te mananao ai. O le taua lena o le malaga o Minisita, le Palemia ma le Sui Palemia, o sui o Matagaluega, o le tulaga lea, e manaia lava le tatou talatalanoa ma fesootei ma a tatou faiga paaga ia. Aua a oo i le taimi e tulai mai ia faalavelave faafuasei ia ma mea faapena, e faigofie lava ona aapa mai ma fesoasoani mai ia tatou. Ae momoli atu le faafetai tele i lau Afioga i le Fofoga Fetalai, faapea sui mamalu o le Palemene na saunoa, mo la outou lagolago mo la tatou Tala i le Tupe. Faafetai mo le avanoa.

**FOFOGA FETALAI:** Malo faafetai. Ua maea ona faatu le lafo mo le faitauina faalua o le Tulafono Tau Faaofi ma ua faaluaina foi.

*Na faamaonia le lafo ma faitauina le Tulafono Tau Faaofi o le Faatatauina o Tupe Faaopoopo (Nu 2) 2019/2020 i lona faitauga faalua.*

**TULAFONO TAU FAAOFI O LE FAATATAUINA O TUPE  
FAAOPOOPO (NU 2) 2019/2020 – iloiloga auiliili**

**FOFOGA FETALAI:** O le a sagai atu le Fono Aoao i le iloiloga auiliili o le Tulafono Tau Faaofi o le Faatatauina o Tupe Faaopoopo (Nu 2) 2019/2020.

E tusa ai ma Tulafono Tumau 135, e amata le iloiloga auiliili o le Tulafono Tau Faaofi i ona faamatalaga.

**FAAMATALAGA MUAMUA**

**VAEGATUPE MA TALA FAATATAU**

**FAAOPOOPOGA I TUPE FAATATAUINA**

<b>MATAGALUEGA</b>	<b>FAAMATALAGA</b>	<b>AOFAI TUPE ALU</b>
<b>FAATOAGA MA FAIGAFIIVA</b>	<b>Aofai Tupe Alu Faaopoopo</b>	<b>\$972,410.</b>

*Faamaonia.*



**FAIGA PALOTA**

*Faamaonia.*

**AOFAI FAAITITIGA AOA O I TUPE ALU 2019/2020 \$(2,921,735).**

*Faamaonia.*

**FUAIUPU 2: Faamatuu atu ma le faatatauina o le \$38,342,532 mai le Faaputugatupe a le Matagaluega o Tupe.**

*Faamaonia.*

**FAAMATALAGA.**

*Faamaonia.*

**FUAIUPU 1 MA LE IGOA**

**FUAIUPU 1: Igoa puupuu ma le amataga.**

**IGOA: Faatatauina o Tupe Faaopoopo (Nu.2) 2019/2020.**

*Faamaonia.*

*Na faagasolo le Tulafono Tau Faaofi o le Faatatauina o Tupe Faaopoopo (Nu 2) 2019/2020 e aunoa ma se Teuteuga.*

**FOFOGA FETALAI:** Ou te faasilasila atu ua maea ona tagofia e le Komiti o le Fono Aoa Atoa mataupu uma na tuuina mai i ai mo le iloiloaina, ma o le a lipoti atu loa ia mataupu i le Fono Aoa.

E tusa ai ma Tulafono Tumau 126(1), o le a toe see atu le Komiti o le Fono Aoa Atoa i le Fono Aoa Faitulafono.

**FOFOGA FETALAI:** Ou te faasilasila atu, ua toe amatalia nei taualumaga a le Fono aoao Faitulafono.

Ou te faasilasila atu ua maea tagofia e le Komiti o le Fono Aoao Atoa ia felafolafoaiga i le Tulafono Tau Faaofi o le Faatatauina o Tupe Faaopopo (Nu 2) 2019/2020 faatasi ma lona iloiloga auiliili, e tusa ai ai o le lafo na faamaonia, ma ua faamaonia nei e le Fono Aoao Faitulafono.

**TULAFONO TAU FAAOFI O TEUTEUGA O LE TULAFONO O  
FALEPUIPUI MA LE TOEFUATAIGA 2020 – faitauga muamua**

**FOFOGA FETALAI:** E tapa lau Afioga i le Minisita o Leoleo ma Falepuipui ma le Toefuataiga, tulai mai faamolemole.

**Afioga Hon TIALAVEA FEA LENIU TIONISIO HUNT (Minisita mo Falepuipui ma le Toefuataiga):** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Falepuipui ma le Toefuataiga 2020 i lona faitauga muamua.*

*Faaluaina e le Minisita o Tupe ma le Minisita mo Aoga, Taaloga ma Aganuu.*

*Na faamaonia le lafo ma faitauina le Tulafono Tau Faaofi i lona faitauga muamua.*

**TULAFONO TAU FAAOFI O TEUTEUGA O LE TULAFONO O  
FALEPUIPUI MA LE TOEFUATAIGA 2020 – faitauga faalua.**

**FOFOGA FETALAI:** Ou te tapa ma le faaaloalo lau Afioga i le Minisita o Leoleo, Falepuipui ma le Toefuataiga.

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Falepuipui ma le Toefuataiga 2020 i lona faitauga faalua ma ou te fia tautala faamalamalama i ai.*

*Faaluaina e le Minisita mo Aoga Taaloga ma Aganuu ma le Minisita mo le Soifua Maloloina ma le Minisita mo Galuega, Felauaiga ma Atinae eseese.*

**FOFOGA FETALAI:** Ou te tapa lau Afioga i le Minisita mo lau saunoaga.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai mo le avanoa e faamalamalama ai le toe tuu faatasiga o le Falepuipui ma le Ofisa o Leoleo. Atonu e le o toe po se lilo i le faafogafoga a le atunuu, i le mea na tupu i Tanumalala, i le taimi ua tuanai atu nei.

O lea e faamalulu atu ai i le faafogafoga a le atunuu ona o le tulaga sa aafia i lea po. Ae o le Tulafono lau Afioga ua faataatia nei i luma o le Laulau a fonu a le Palemene. Ua tali atu i suiga o le Tulafono Tau Faaofi le faamamaluina aloaia o le faaiuga a le Malo, ina ia tuufaatasia galuega tau leoleo ma galuega tau falepuipui ma le toefuataiga a Samoa i lalo o le Pulega a le Komesina o Leoleo. O lea toe tuufaatasiga lau Afioga i le Fofoga Fetalai, o lea ua faataatia mai le Tulafono Faatonutonu e fesui ai le Teuteuga o le Tulafono o Falepuipui ma Toefuataiga, e avatu ai le malosiaga sa i le Komesina o Falepuipui I le Komesina o Leoleo na te vaaia ai le Falepuipui ma le Ofisa o Leoleo. O lea foi e faatulaga mai le tele o suiga i totonu o Fuaiupu 1, 2, 3, 4, ma le 5 o le Tulafono o le Falepuipui ina ia mafai ai ona tauave e le Komesina o Leoleo le malosiaga o lo o i lalo lea o le fautuaga a le Minisita. Atonu foi o le aso lenei e mafai ai ona faapea o le a mafai ai loa ona tuufaatasia pe a pasia le Tulafono lenei. Ona o lo o galulue pea le galuega i le taimi lenei i lalo o le warrant, ae a uma ona pasia le Tulafono o taatia nei i le Maota, ona faagaoioi loa lea o fuafuaga uma o lo o i totonu. O le taimi lenei i le Falepuipui lau Afioga i le Fofoga Fetalai ma le mamalu o le Palemene, ua 8 nei masina talu ona amata le galuega lea i Tanumalala mai le tausaga lea. Ma e tele foi Polokalame sa fuafuaina mo le agai i luma o le Falepuipui.

Paga lea e le i fuafuaina mea tutupu. Ia ae o le agaga ia ma le tulai mai o le suiga lenei, ia atonu foi o le suiga lenei e talafeagai mo lenei vaitau, ina ia toe tuufaatasia ia Matagaluega ia e 2, ia sa faapea lava ina ua faatoa tuueseese i le 2015, vaevae ai ia Matagaluega nei ma amata mai ai ia le galueina o le Falepuipui.

O le taimi lenei i Tanumalala ua uma ona fausia uma ia nofoaga mo le faamoemoe. O le faamoemoe o le nofoaga lea na fausia ina ia lava tapena mo le saogalemu o pagota ia aemaise foi ia leoleo. Paga lea e ese lava fuafuaga sa feagai ma le tulaga na oo i ai.

O le taimi faatoa ou tauaveina ai le tofi Minisita o Falepuipui, sa ou oo atu ai i le toese i Tafaigata i le ta o le 10 e lata i le 11 i le po. Sa ou fia vaai i totonu o potu. Ia o se vaaiga matuia sa ou vaai i ai. E ova ma le 50 tagata sa i potu ia e taofia. E pau lava potu sa tai 20 tai 25 o potu taofia foi ia e tau o le au remand, ona e 3 ia vaega sa i ai. Ao i i le main, ia o le aofaiga lava lena sa i ai. E tofafa pagota e gagau ia o latou vae e tofafa i lea po. Ma o lou foi mai i lea asiasiga i le po, ia sa amata ai loa ona tuu le tuualalo i le Malo ua tataua ona fausia ia se falepuipui fou.

O lea la ua maea ia le tele o le falepuipui ma ua faaogaina, e i ai mea e tatau ona toe faaleleia ina ia mafaia ai pea ona maua ia le sifi mai o leoleo i le faatinoga o latou tiute. O lena ua i le Tulafono ia le tele o suiga, ia ma le malosiaga i le Komesina but e i lalo lava o le vaavaaiga a le Minisita. O a lava faaiuga fai e tatau ona logo mai ia le Minisita i mea uma e tatau ona faafeagai ma le vaavaaiga o le Falepuipui.

Ia e pei o lau tala atu lena i lau Afioga i le Fofoga Fetalai aemaise ia le mamalu o le Palemene. O le mafuaaga lena o le Tulafono lena o le toe tuufaatasia ai le Ofisa o Leoleo ma le Falepuipui. Faafetai mo le avanoa lau Afioga.

**FOFOGA FETALAI:** Malo, malo le saunoa i le Minisita. Ua maea faafofoga le Maota i le lafo na tauala mai i le saunoaga Faa-Minisita a le Palemia mo le tagofia o le Tulafono Tau Faaofi i lona tulaga faanatinati.

O le faagasologa la lena i le Tulafono Tau Faaofi:-

1. Tofa Nafaitoa Talaimanu Keti, Sui Fofoga Fetalai po o le Taitaifono o le Komiti o Tulafono Tumau, Faiga Palota, faapea foi Talosaga ma Tofiga Faale-Faavae.
2. Afioga Faaulusau Rosa Duffy Stowers, Sui Usufono mo Gagaifomauga Nu.3.
3. Tofa Ili Setefano, Sui Usufono mo Aana Alofi Nu.2.
4. Afioga Sulamanaia Fetaiai Tauiliili Tuivasa, Sui Usufono mo Vaimauga Sasae.
5. Afioga Fuimaono Teo Samuelu Teo, Sui Usufono mo Falealili Sasae.

O le faagasologa lena o saunoaga a sui usufono. E silasila atu foi ia sui usufono uma ua na o latou ua taua suafa e saunoa i mataupu. O saunoaga foi ia e le silia ma le 5 minute e saunoa ai le sui usufono e toatasi. E le tatau ona silia ma le 60 minute e talanoa ai ia lena Tulafono e tusa ai ma Tulafono Tumau e 33(2) (a).

Afai e maea saunoaga ua faatulai ae o lo o lava le taimi, ia atonu o le a faapena foi ona fetuunai. Ou te fautua foi i le Failautusi ina ia faapena foi ona tulimatai ia le tai 5 minute o saunoaga a sui usufono. Ma ou te tapa lau Afioga i le Sui Fofoga Fetalai mo lau saunoaga, e amata ai ia saunoaga o le tatou Tulafono.

**Tofa NAFOITOA TALAIMANU KETI (Sui Fofoga Fetalai, Gagaemauga Nu.3):** O so o se suiga lava o se mataupu lau Afioga i le Fofoga Fetalai, e tele ia fesili e fia agai i ai, e manaomia ai le toa o le loto e faatino ai le faaiuga tatau. Ona o mafuaaga tatau e tatau ona fai ai suiga. E i ai le talitonga o lou sui usufono, o le mau foi lea e tauave e le HRPP, pati o lo o tu i le foe o lena Paeaiaga. Toa le loto e fai ai ia suiga lelei, mo le



puiipua ma le saogalemu. O le filemu ma le manuia o tagatanuu uma o Samoa.

Lau Afioga i le Fofoga Fetalai, e i ai le manatu o le a le tuua i tuagalu lagona o lenei itumalo, Gagaemauga Nu.3 e faapea foi lenei usugafono, ona o le taimi ua tatala mai e utiuti lava. Ae ao ona faaleo le faamalo i lau Afioga i le Minisita o Leoleo, Falepuipui ma le Toefuataiga. O le ola fuataiga mo le toe teuteuina o le Tulafono e pei ona lumamea o le Maota i lenei vaega o le aso.

E matau atu i le nofonofo ma matau i le Tulafono, e 14 Teuteuga o le Tulafono Autu 2013 o lea e taoto mai ai i totonu. E i ai lea o le lagona o lenei itumalo lau Afioga i le Fofoga Fetalai, e fia faaleoina le matua lagolagoina e lenei itumalo o le suiga lenei. O le Tulafono Tau Faaofi o lea ua tuuina mai i lenei taeao i le Maota. O le toe tuufaatasia lea, o galuega tau leoleo ma galuega tau falepuipui ma le Toefuataiga i lalo o le Pulega a le Komesina o Leoleo. E taua tele.

O lea e atagia ai lau Afioga i le Fofoga Fetalai, le galuega faaleoleo i lona tulaga lautele. E le gata i le suesueina o mataupu ma le tuuina atu i luma o le Faamasinoga, e faapena foi ona faaauau lava, seia oo i le taimi e tuli ai le faasalaga ma le soifua toefuataiga. O lona uiga, o le ala lea o le avatu o se faamatalaga a lenei itumalo, o lea ua atoalio le masina. O le agaga maualuga lea e atoa ai.

O lona uiga, o le tulai mai o faafitauli e pei ona saunoa lau Afioga i le Minisita, e mafua o le le atoatoa o le malamalamaaga i tulaga uma sa amata mea ai. Aua o le aveina o tagata e tuli ia o latou faasalaga e tusa ma le faaiuga a le Faamasinoga, e le o se galuega faigofie, e le faigofie. Aepeitai o le aumaiga o le Teuteuga lenei, e i ai le manatu ua matua taoto lelei i lagatonu mea uma.

O le Matagaluega o Leoleo ma le Pulega, ua masani i le vaaiga o le Falepuipui, masani. Ua leva ona latou tauave maia. E i ai foi ni faafitauli na tutupu, aepeitai, e sili ona taua atu i le Matagaluega a Leoleo i le Pulega o le Falepuipui ma le ola Toefuataiga na i lo o se isi lava mea. E mafua i se a? E pei lava ona ou avatu. O la e fusi ai le fau o Malo i mea uma. E silafia e Taitai o le Matagaluega o Leoleo, mind set o tagata ia. Na afua ai soligatulafono na afua ai ona fai ia faaiuga a le Faamasinoga ma le toe taumafai e toe fautaiga le ola. Aisea? Se i fai se suiga, ina ia mafai ona maea ia le tuliga o le faasalaga ia ma toe faigofie ona toe faaofi i totonu o le atunuu ma le community.

O le ala lea ua ou manatu, e momoli ai le faafetai tele i le suiga lenei. E pei lava ona ou avatu i upu tomua, so o se suiga lava, e manaomia ia le toa o le loto. Aisea? Leaga e i ai foi ia faitioga. Ae o le aumaiga o Teuteuga nei ma ona aulape, lau Afioga i le Fofoga Fetalai, e matua lagolagoina e lou sui usufono. Aisea? E tasi lava lenei o sui usufono sa leva ona galue

35 tausaga. Sa ou galue foi i totonu o le Falepuipui ou te malamalama lelei i ogaoga ma aulape.

O le taimi foi na tuuina atu ai ia political prisoners, sa ou alu lava ma ave i ai au, aisea? Puipui ne i aafia le lautele. O tulaga uma, o totonu o le falepuipui e 2 vaega tetele la e taoto ai. O le falepuipui ma le soifua Toefuataiga and Prisons and Corrections, rehabilitational o le mamalu o le atunuu pe a oo i le taimi e toe o mai ai i tua. O le agaga lena, ae o si ona pona, ua nunumi faatasi i uta, ma le maua ai se toa o pagota, tulou lou gutu. O le ala lea o le tulai mai o nai faafitauli lau Afioga.

**Tofa Olo Fiti Afoa Vaai:** Lau Afioga i le Fofoga Fetalai o se mea e fia faasao. O le a ou le fai atu i le habilitation po o le a le mea na e saunoa ai. O le sui usufono tonu lava lea na toe taape ai ia le falepuipui i lena taimi. Ia o lea la ua toe taumafai nei e toe tuu mai, o le mea sili la ua na silafia lelei le mea e tatau ona toe faalelei.

**FOFOGA FETALAI:** Malie le sui usufono, e leai se mea e alagatau ai lou tulai mai.

**Tofa NAFOITOA TALAIMANU KETI:** Lau Afioga e pau lea o le sui usufono e le usitai. Ioe, o so o se tagata e fia saunoa i le Maota lenei, seivagana ua faataga e le Nofoa. E na o le pau lea o le sui usufono e pei e fia... Ia ua lelei, e pei o tala a isi, 'I'm watching you'.

O le vaega 5 o le Tulafono...

**FOFOGA FETALAI:** Faaiu mai le saunoaga.

**Tofa NAFOITOA TALAIMANU KETI:** Ia o lea o le a faaiu atu. O lo o i ai le faatuina o le Deputy Commissioner, e matua lagolagoina lea mea. O le taimi nei o lea foi e i ai le Deputy Commissioner i i le Ofisa o Leoleo, e tatau foi la ona taga tutusa. E pau lava mea la e i ai, o mea o ACs, Assistant Commissioner. O lea e aumai le Tulafono e 1 o le taimi nei e 3 ACs la e i ai. O le a le faiga? O le popolega ia te au, o le tulaga foi lea o le finagalo o le Komesina e feseiai e transfer le staff i le mea e tatau ma onomea ona tuu i ai mo le taotoga lelei o le operation.

O le mea la lea na ona tuu atu faapena, ma ni isi mea e toe silasila ifo i ai lau Afioga, ia o le tulaga lava ia e manaia lava le tuu atu e alu faatasi loa i totonu. O le tulaga o tau, salary, o totogi. O leoleo o la e amata i le \$11,500 o le falepuipui o la e amata i le \$14,500 tulou. Ae o le agaga lea e toe avatu ai, se i toe silasila ae e le o le taimi tatau lenei e tatau ona faapaleni ai loa mea ia. O le agaga lena, ae o lea lava e manaia le Tulafono lea e taofi le afaigaluega, taofi. Leaga o le agaga tele lea e tau popole ai le mafaufau e oo foi i le sui usufono lea na tulai mai, o lona lava lea

atugaluga, o tagata, o tagata ae o lea ua aumai le Tulafono masalo e le o silasila i ai, o lea e i ai le utaga loloto a le Malo.

Lau Afioga i le Minisita e taofi iumaea ai tagata ia e le mafai ona aveeseina. Seivagana, e pau o le mea o le toe tuu i totonu e train. O le koleni a Tafaigata e na o le 3 vaiaso, training, ae o i i leoleo, 4 months, 17 vaiaso.

Ia faaiu atu lea o se matou tala, e manaomia le qualify lelei o Officers po o Prison Guards aua le galuega i Tanumalala. O le ala lea o le tulai mai o faafitauli ia. Manuia le tapuaiga a Samoa. Manuia le Eseta Samoa. Stay safe. Manuia le Fono.

**FOFOGA FETALAI:** Malo, malo faafetai i lou uso mo le saunoaga. Ia tulai mai ia le sui usufono mo Gagaifomauga Nu.3, le Afioga ia Faaulusau.

**Afioga FAAULUSAU ROSA DUFFY STOWERS (Gagaifomauga Nu.3):** Faafetai i lau Afioga i le Fofoga Fetalai, mo le tofiaina foi o lenei sui usufono e faaleoina foi se leo e tusa ai o le Tulafono Tau Faaofi. Ia e vave foi lava ia nai manatu.

E muamua lava ona momoli le faafetai i le Afioga i le Minisita, le Komesina ia faapea foi le Matagaluega e tusa ai foi o le faalavelave na tulai mai.

O lona 2, o le faafetai lea i le mamalu o le atunuu sa faapena ona ofoina ia fesoasoani ina ia fesoasoani atu ai i le Matagaluega o Leoleo i le tapueina o pagota.

Ia ma le lona 3 o faafetai, faafetai i le Afioga i le sui usufono ia Toleafoa Ken Vaafusuaga, le afioaga faapea foi le itumalo o Lefaga ma Faleaseela, e tusa ai ma le fesoasoani sa tuuina atu i le Matagaluega o Leoleo i le tau tapueina ia o faalogotata o latou foi o lo o nofoia lea malae.

Ia o le lona 2, o fautuaga. O le fautuaga muamua, ia siitia le auaunaga a leoleo. O le laualuga lava o lenei auaunaga, o le saogalemu o le mamalu lautele o le atunuu. O le a foi lava le tau e tatau ona faatino ai ia lea auaunaga? Ia faapena ona faamatuu i ai, ona o le mea e tatau ona fai. O le malupuipua ma le nofo lelei o le lautele o le atunuu i le saogalemu o le siosiomaga o lo o alala ma afifio ai. Ia faapena ai lea ona siitia ia le capacity building, ia po o le faatinoina o le auaunaga, ae amata mai lava i le Minisita ia le capacity building lea aua le gafataulimaina e le gata i le falepuipui ia o traffic, o mea uma lava ia ua i ai, ina ia lava le silafia ma le iloa a le Minisita ma i latou uma o lo o galulue i lea Matagaluega.

A fesiitai la latou mai i lea mea i lea mea, ae o la o lo o lava tapena. E faapena foi la ua ou taua le Afioga i le Minisita, ia faapea e tatau ona ave i se fale kalake e ao ai lana kalake, ia aua lona saogalemu. Ia aua e leiloa lava le tulaga e ono tulai mai o lea na saunoa, na asiasi i ai i o i le falepuipui i le ta o le 10. Ia ana alu atu nei la ua o mai i fafo ia pagota, e

aafia ai lona soifua. Ae a faapea e tupu mai se faalavelave ae tulai atu ma le faa-kalake la lea, ia malupuipuia lava lona soifua.

O lona 2 o fautuaga, ia siitia totogi o le Matagaluega o Leoleo, ona o lea ua faaopopo i ai ni isi galuega faatino, ia ma le laualuga lava lea o le saogalemu o Samoa.

O le lona 3 o fautuaga, ia amanaia ia le laueleele o lo o tu ai le falepuipui aemaise lava o le faiganuu a Lefaga ma Faleaseela, aua a tulai mai ia ni faalavelave faapea, ae o la e mafai ona toomaga i ai leoleo mo se fesoasoani.

Ia o fautuaga na, ia ona oo atu ai lea aua o la e lava ia au minute. O le faafetai, o le faafetai i le Koviti 19. O le faafetai ona ua pei ua avea lea ma mea ua lagona uma ai e tagata, ua christianized uma ia le lalolagi i le tulai mai o lenei faafitauli. Faafetai foi i le Malo i le ave o le faamua, ma le taimua i le State of Emergency i le 2 vaiaso lea na muamua, amata i le anapogi ma le tatalo, ona o i lea e taula ai le sa o Samoa. Malo le tofa faafetai lava le uta.

Ma le faafetai mulimuli lau Afioga i le Fofoga Fetalai, faafetai lava ua ou tu i le mea maupuepue, ma ua mamao atu foi Olo ma au. Ma le faaaloalo, manuia lava le Eseta i lau Afioga ma le mamalu o le Maota, soifua.

**FOFOGA FETALAI:** Malo, ia o le fetalaiga ia Ili, tulai mai lau Tofa Ili mo le saunoaga o le sui usufono mo Aana Alofi Nu.2. O le mataupu e pei ona saunoa ai le sui usufono o Gagaifomauga Nu.3. o le itumalo tonu o lo o tu ai le falepuipui o se vaega o Lefaga ma Faleaseela, ia ma o le afioaga o Fasitoo-uta mo le silafia ona o la e tapuai faafofoga mai le itumalo.

**Afioga FAAULUSAU ROSA DUFFY STOWERS:** Faafetai mo le faasaoga.

**FOFOGA FETALAI:** Ia e faapena foi Nofaalii i le isi pito. Tulai mai ia le sui usufono o Aana Nu.2.

**Tofa ILI SETEFANO TAATEO TAFILI (Aana Alofi Nu.2):** Faafetai i lau Afioga i le Fofoga Fetalai mo lou avanoa. Ia e pei ona malie i lau saunoaga, ia ai ona o le tatou itumalo o le isi lea vaega o lo o i ai ia le falepuipui, ia ua afea ai i lau faasoa ia lenei itumalo e avatu se lagona e tusa ai o le Tulafono Tau Faaofi toe Teuteu, i le toe tuufaatasia lea o le Pulega o Falepuipui ma le Ola Toefuataiga ia faatasi ai ma le Matagaluega o Leoleo.

E manatu foi a o le i faia se faamatalaga i le Tulafono, e matau atu foi ma le totoa i lenei itula i lenei foi taeao ma le Fonousu a Samoa, ua faiva ese Lopepe. A uma ona tatou mei i le tulaga faa-komiti, ona tatou mei foi lea i

le tulaga faa-fono a le Palemene. Ia e matau atu foi o matou sui usufono fou, ia e matagofie foi ia lea fetuunaiga.

Ia ae o lenei itula, e matau atu e le alu loa ia le faamatalaga a lenei itumalo, e faailo foi le agaga faafetai i le Taitai o le Malo ma le Kapeneta, ia aua foi le feagai ma luitau o le soifuaga ua tatou i ai. E tele ina le mautonu ona o le faamai e pei ona tapisa ai le lalolagi, ia ae faafetai tele o lo o mau pea le toovae, i le Taitai ma le Kapeneta, i le fetuutuunaiga aua le puipuiga o si o tatou atunuu laitiiti, toe maaleale lona tamaoaiga.

E le gata i lea, ae faamauina foi le agaga o le faafetai tele lava i ai latou o lo o i tua atu o le faatinoga o lenei faamoemoe. Galulue e le faalogologotiga i le ao ma le po ia aua le puipuiga o si o tatou Malo o Samoa.

E faamauina foi le agaga o le faafetai i le Afioga i le Minisita o Tupe, ia aua le faasoia ua faapena ona fetuutuunai i lenei vaitau o le faigata, o feagai ai ma si o tatou atunuu. Ua leai lava se vaega o Samoa, ua le oo i ai le faasoia a le Malo. Afai foi o faafogafoga mai Samoa ua leai se vaega ua le afea, ia o lo o tatala pea le avanoa i le Taitai o le Malo ma le Kapeneta e faaleo ai.

Ae o lenei itula ua ou tulai atu ma le agaga faaaloalo, e avatu se manatu e tusa ai o le Tulafono e pei ona folasia i le Laulau-a-Fono. O lea ua manino auofala i le faamalamalamaga a le Afioga i le Minisita, i le mafuaaga o lenei toe Teuteuga o le Tulafono ua tuufaatasia ai ia le Matagaluega o Leoleo faapea foi ia le Falepuipui ma le Ola Toefuataiga.

O le fesili lava e fesili ai, faamata o le fetuunaiga lea o le a foia ai le faafitauli e pei ona tulai mai i futia ua alu i le vaega lea o le sosola o pagota? Afai o le fofo lea, ia e matagofie. Ae tau lava ina ou toe faamanatu atu, o le taimi foi ao i ai le Falepuipui ma le Ola Toefuataiga i lalo o le Matagaluega a Leoleo, sa i ai foi faafitauli sa tulai mai. Ia ae talosia ia i lenei toe suiga fou, ia o le a tele foi se suiga o le a tulai mai, e pei ona i ai ia le Komesina nei ma le Pulega.

Na pau lava le vaega sa atugalua i ai ma popole i ai lenei itumalo, o le aafia o tagata faigaluega. Aepeitai ane o le matau atu i le Tulafono ma lona Teuteuga, o lo o taoto lava i lagatonu ia le aufaigaluega i ona vaega uma seivagana ai ni nai teuteuga laiti o le toe faia o ni aoaoga faapitoa mo i latou o lo o faapena ona vaaia ia le falepuipui. Ae o le Teuteuga lava ia i lona aotelega, e lagolagoina e lenei itumalo le Teuteuga e pei ona i ai.

Ia o lea se matou faamatalaga, manuia tele le Eseta i le Palemene nei, ia faapea le faafogafoga tapuai a Samoa, soifua.

**FOFOGA FETALAI:** Faafetai, malo le saunoa i le Afioga i le sui usufono mamalu. Ou te tapa ma le faaaloalo le sui usufono o Vaimauga i Sasae, lau Afioga Sulamanaia.

**Afioga SULAMANAIA FETAIAI TAUILIILI TUIVASA (Vaimauga Sasae):** Ia faafetai i lau Afioga i le Fofoga Fetalai mo le avanoa. Ia a o le i faia foi se sao o lenei itumalo e tusa ai ma le Tulafono Tau Faaofi ua opea i le Maota, e avatu ai se agaga faafetai o lenei itu. E ui lava i aso ae le lauaso. E ui foi i taeao ae le lautaeao. E ui foi i le tele o Fonotaga i totonu o le Maota lenei, ae e pei e tumatila lava ia le taeao lenei. E mafua i se a? A lea ua tatou aiga fesilafai, ua tatou faletalatala, e ala i le soifua laulelei o tupu ma tamalii o le atunuu o tatou o taitai.

E ui lava o lo o i ai ia le faamai oti i le lalolagi, ae e tatou te faafetai pea i le Atua. O lea e omai i lenei taeao, afifio ma tala mai aao, e leai lava se isi o lavea i le faamai i totonu o le Maota lenei o taitai o le atunuu. O lou agaga faafetai lea.

Faafetai lava i le Afioga i le Taitai, e le selu atu. Faafetai i lou toa, to'a, ia e faamoemoe i le Atua mea uma. O lea e malu ai le taeao ma le sa o le atunuu nei. Faafetai foi i le vasega o Minisita ma lena Itu, e a foi lenei Itu. Se ua ta tu lava i lenei itula lau Afioga i le Fofoga Fetalai ua ta lia, i le maualuga o lenei faaeaea ua tu atu ai le sui usufono o Vaimauga Sasae po o Tuisamau, faafetai.

O le tatalo a lau Afioga faafetai i mea lelei e tutupu i lou vaitau. Aua le toe suia le nofoaga lenei. Ua manaia leaga ua maualuga ai lenei itumalo. Faafetai foi i le faaaloalo faa-auro ua tofofi ai le sui usufono lenei o Vaimauga e lauga. E a? E ese lava le taeao lenei. O le taeao ese lenei i lenei Maota. Faafetai i lau faaaloalo ua to mai so matou matupalapala. E le tuua foi i lalo le maualuga o lou lea agaga faafetai lea i lau Afioga.

Ae tama o le atunuu, faafetai o lo o i ai se tama e tua i le Atua. E faamoemoe i le Atua, faafualoa pea lou soifua. O le tele o taimi e vaai atu ai i le TV, o lo o e taumafai pea e logologo puialii le atunuu, puipui pea ma kava oe e le mana o le toto o le tamai mamoe.

Fai mai o Iona, le toaina o Iona, ina ua tofi e le Atua e alu i le nuu lea o Sineva a? Nineva, Nineva lava o Sineva lena. O le teine lea ou te se ai ae o Nineva. Lea na fai i ai le Atua, alu i Nineva, ua ou faalogo i le agasala a le nuu. Ae a? Fai mai na sola Iona. Ae a le Palemene lenei ma taitai o le atunuu? E le o sosola.

Ae faafetai e ui i le tele o taimi tatou te o ese ma le Atua, a o lo o i ai pea le alofa tunoa o le Atua ia Samoa. Leaga ua uma ona tatou declare i le Maota lenei o Samoa o le atunuu e Faavae i le Atua. O Iona Alo le Agaga Paia lea foi ua alu atu talaave i le lalolagi atoa e ui ina e le o toe faapotopoto ni tagata, ae a le taeao lenei? O le taeao ese lenei. Ua vaai mai le lalolagi ona o le a? Ua uma ona tatou faalauiloa i le atunuu ma le lalolagi o le atunuu lenei e faamoemoe i le Atua.

E tatalo i lau Afioga i le Palemia, aua ne i toe omai ni vaalele. Matuai ban vaalele toe faapoopo le isi 6 masina. Manuia lau Afioga ma le Kapeneta ma lenei foi Itu o le tatou Maota.

O le Tulafono Tau Faaofi o le Falepuipui, ia e lagona lava le faafetai i le Afioga i le Palemia i le vave o ana fetuunaiga. E pei o le mea lena e ta te mimita ai i se taitai e matau i le Atua. E tupu loa le faafitauli fofo loa.

O nai fautuaga e tuuina atu, o atunuu i fafo e tutupu loa mea faapenei, e muamua lava tuli le Minisita. Tuli, e a? E le o faia le galuega. Ae a lenei Paeaiga ma lenei Faigamalo? O lea e faafetai lava i le taitai o lo o ave pea i ai le faatuatuaga. O lea ua maua tala o lea ua leai le sa Faa-Komesina o Falepuipui. Ae mafua mai i le a? Fai se fuafuaga i le Minisita.

Lau Afioga i le Fofoga Fetalai, o le isi tulaga e popoe ai le sui usufono lenei, o le Komesina o Leoleo ma le ua ave i ai le faatuatuaga. Silasila foi i le vaega lea o le LTA, lea na aumai ai le Traffic ave i lalo o Leoleo, o le a le mea na i ai? Talofa e, na matuai alu ova ma le ½ miliona le tupe na toe pay ai ia le staff lea a le LTA. Leaga ua fai atu le Palemene lenei e omai ia le Traffic e o i lalo o Leoleo...[.....] Fai ia ana faiga e o e train faaleoleo. O lea la na a? O le manumanuga o le sui usufono lau Afioga i le Fofoga Fetalai, ina ne i te i ua toe tupu se vaega lea se vaea. Po o se vaega ua le mafai e tagata ona...

**Afioga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr Sailele Malielegaoui:** Lau Afioga i le Fofoga Fetalai...

**FOFOGA FETALAI:** Malie le sui usufono, se i tali atu le Malo.

**Afioga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr Sailele Malielegaoui:** E i ai ia le tatou Tulafono foi lea mo le puipuia o latou e le o mafai ona auai i totonu o le tatou Maota ma puipui latou. E pei ua fai sina mamao tele o le mea ua oo i ai le saunoaga a le sui usufono. A o suiga ia lea na tulai atu ai le Afioga i le Minisita, e faigofie lava. E le o ni suiga faigata, ma e o le tulaga foi e fai ai uiga ia, leaga o le mea lea e agai i ai le lalolagi, Malo Afaatasi Malo malamalama.

Ae o le mea lea sa i ai ia le tele o Malo, e alu lava i le maso ia le tulaga o pulega. O le ala lena na ala ai ona tuueseese, e le o se agaga leaga na ala ai ona faatino ai. O le agaga lelei o la e lelei isi atunuu, ae o tatou, e le i taitai lava ona oo i ai.

O le tulaga lena ua ou toe tulai atu ai lau Afioga leaga ua fai si televave ese lava o le saunoaga a le sui usufono, ae e le agai mai i le tatou mataupu.

Ma le isi mea lau Afioga i le Fofoga Fetalai e faataua le itu lenei, o le isi lea tatou Tulafono taua tele, o le puipuia o latou e leai so latou leo e puipui ai e latou ia latou i totonu o felafolafoaiga nei, leaga o felafolafoaiga nei, o lea e alu atu i lo tatou atunuu. Ina ne i aafia fua sui o lo o agai i ai le lauga, ae e le o le tulaga na o lo o i ai.

Lau Afioga i le Fofoga Fetalai, o le tuualalo lea e tatou te i ai i taimi faigata, a o le vaiaso foi lenei, o le vaiaso paia. E paia uma ai lava lauga tatou te le o toe agai i tulaga e vevesi ai tatou.

**FOFOGA FETALAI:** Malo, ia malie le sui usufono se i fai atu ia le fautuaga leaga o lea ua tautuauega se fautuaga a le Nofoa ae ua televave ia le saunoaga a le sui usufono. E matua tapu ia tatou Tulafono Tumau ia le agai o se saunoaga ma se lauga a se sui usufono i le paia o le atunuu. Ia aemaise o latou o Ofisa Sili o Pulega o Matagaluega, o lo o auauna i le ao ma le po, po ma le ao, ae le mafai ona tali mai i totonu o le tatou Fonotaga lenei. A o le saunoaga a le sui usufono, o le saunoaga i lou lava lea finagalo. Ia, ae o le a toe leaga lava lau saunoaga le Vaimauga, ioe, aua... ua maumau lau saunoaga le toe faaleaga i lou toe mei lava i le itu lenei. Na e tele loa i le itu lenei e i ai le isi sui usufono lenei faaletonu loa lau saunoaga.

Ae malie, o le a toe faafoi lau saunoaga lea na taua ai le Komesina o Leoleo, aveese ma faamaumauga a le Fono ae saunoa mai e faaii mai le saunoaga.

[Upu na faatonuina e le Fofoga Fetalai e aveese mai saunoaga a le sui usufono mo Vaimauga Sasae – *“Ae fai foi ia le fiapoto o le Komesina ia.”*]

**Afioga SULAMANAIA FETAIAI TAUILILI TUIVASA:** Lau Afioga i le Fofoga Fetalai, o le tulaga foi o lenei taeao ma le... e pei lava ona ou fai atu, ia toe faafoi mai pe a faapea foi ua paopapa le... a o le manatu lava lenei o le sui usufono ia, ona o le popolega i le toe tuufaatasiga lea. E oo foi i le tulaga o le... Faafetai lava ua mafai ona afea le tulaga lea e fai se Sui Komesina o le Falepuipui, a o lea foi e maua o le a toe faasalalau. O le popolega o le sui usufono ina ia faaoga pea sui o lo o i le Falepuipui e avea ma latou nei ina ia mafai ona faatino ai pea le auaunaga. Aua o le popolega lenei o lou sui lea e i ai ne i te i ua fai se vaea ma faapena, a o lea tatou te i ai i le vaitaimi o aafiaga o lenei faamai.

**FOFOGA FETALAI:** Malo faafetai. Ua maea le taimi o le sui usufono. Faaii maia le saunoaga.

**Afioga SULAMANAIA FETAIAI TAUILILI TUIVASA:** O le a faauma atu lau Afioga. Lau Afioga i le Fofoga Fetalai, ia, na pau lenei o sina tulaga foi sa avatu ai se manatu, a ia agalelei le Atua i lau Afioga i le taitaiga o lenei Fonousu aemaise foi o le Taitai o le Malo ma le Kapeneta



aemaise foi Minisita Lagolago aemaise foi o lenei Itu o le Maota. Ia agalelei foi le Atua i Ofisa Sili o Pulega o Matagaluega a le Malo, aemaise Samoa ua potopoto i le faafofoga mai i maota ma laoa, ia manuia Samoa mo a taeao, ona o Iesu. Amene.

**FOFOGA FETALAI:** Malo faafetai. Ia, se i tulai mai le sui usufono mo Falealili Sasae e faaiu mai le saunoaga i lo outou seelima ona tali lea o le Malo.

**Afioga FUIMAONO TEO SAMUELU TEO (Falealili Sasae):** Ou te manatu o lea ua lologo faatuli o matuu le tai soua aemaise o le fafati feai o galu. E le na ma le laina le faamai ua pesia ai le lalolagi. E faatomua atu ai se tala a lenei itumalo. Ae o le mea mautinoa, e leai lava se aufai tatalo o nofonofu i faafeagaiga taulagi i lo latou sa folafola, aemaise foi o le tapuaiga leleoa a tupu ma tamalii, tagatanuu uma o Samoa o lo o faanonomanu aua lenei faamai. Ae mautinoa ua tali le Atua i talosaga a Samoa. A lea ua tali e ala i le Palemia ma le Kapeneta ma tulaga o le sa ua faataoto mai. O le mea lena e avatu muamua ai le faafetai tele i lau Afioga i le Palemia ma le Kapeneta, e i ai le lagona a tatou aveaveai pea faapea, e le mafai ona sao mai le faamai ia tatou. Ae ua aveia foi lenei faamai ma auala, o se vaaiga matagofie le toe agai o tagata i le sami ua toe uu peaato se i tulou ma agaese a i latou ua toe foi i le fanua aua o lea ua mautinoa afai e le toe feoi ni vaa, o le a tua lava Samoa i ona laufanua ma ona gataifale aua le mataiai a le atunuu.

Ou te lagolagoina vaega o le Tulafono e pei ona aumai. I le faitau atu i le Tulafono, e pei e foliga e tele, ae na o ni suiga laiti. E pei e foliga o lea ua toe foi i le mea sa i ai muamua. Aua o suiga e fai i mea e tutupu i lea taimi ma lea taimi ma mafuaaga e tatau ai ona fai suiga. Na pau suiga o lea ou te mautinoa, faafetai i le suiga lea, o lo o faamautinoa ai le le aafia o latou o faigaluega. O faamanuiaga uma o i latou o faigaluega i le taimi nei faakonekarate aemaise foi i latou faigaluega, o lea e pei e foliga o le a faaaauu pea seia oo i le taimi e muta ai a latou konekarate e faapea foi i latou faigaluega.

O le isi vaega lea pei foi ona avatu foi e nisi o sui usufono, o latou **inhouse training**. Afai o lea o le a tuufaatasi, o lona uiga e tatau foi ona i ai se vaega aoaoina, ae le faapea o ni vaega foi lele o le a saili ai pe toe nofo pe toe alu, ae tatau ona aoaoina lelei i o latou tiute.

O le vaai i le suiga lenei o le Tulafono, e pei e foliga mai o le vaega na popole i ai le taofi, o le filifiliga ia o Komesina Lagolago lea e fautuaina mai e le Komesina o Leoleo ma Falepuipui agai i le Kapeneta pe le alu i le faiga masani e filifilia ai a tatou ACEO, ina ia mafai ona alu lava i le process lea e tasi ona o lea ua tuufaatasi. E pau le lelei o vaega uma o lea e subject i lalo i le Minisita o Leoleo ma Falepuipui.

O le vaega e tatau ona faamanatu i le alii Komesina ma i latou o lo o galulue, o le taijala faavae i lalo o le Tulafono lenei o Falepuipui ma... o lo o i ai upu muamua lava i le (a) ia faamautinoa o lo o puleaina le falepuipui e tusa ai ma tu ma aganuu a Samoa. O le vaega lena e tatau lava e le mafai ona aveesea. Afai o la e lelei le faatulagaina po o le structure o lo o i ai nei, ia ou te iloa afai lava o le tagata e mafua ai, e autilotilo i le tagata. O le faalavelave ona o lea ua faalava le amoa i le tulaga o le faataoto maiga o le Tulafono, ae matua lagolagoina lava e lou sui usufono le Tulafono e pei ona aumai nei, faatasi ai ma i latou o lo o faatumauina pea lo latou galulue i le taimi nei. O le upu moni lava, o le tele ia o se galuega aemaise foi o ni equipments po o mea e faatino ai latou galuega e moomia. Aua o le upu moni, a na se osofaiga o i ai se faamoemoega matautia i tua, o lona uiga, e tele le afaina o i latou o e sa tiute i le po lea, ae le i i ai se mea na tua i ai latou. A o lea e i lalo o le Tulafono, o lea e matau atu, o lea e mafai ona faaoga e latou tulaga foi ia o fana ia e le o ni fana e i ai ni pulufana, fana foi ia e i ai asu faatagimata ma fana ia e mafai ai ona faavaivai le tino mo ni nai minute po o chasers foi ia. O lea e pei e foliga o lea e i lalo o le Tulafono, aua ana i ai ni mea faapena a i latou ia na leoleoina faitotoa ma... ou te iloa e leai se pagota e alu i fafo. Ou te iloa o nisi na o vaega.

**FOFOGA FETALAI:** Ua maea le taimi o le sui usufono.

**Afioga FUIMAONO TEO SAMUELU TEO:** Ia, faatasi ai ma le mea lea pei ona avatu e se tasi o sui usufono, o le rehabilitation. E tusa e ese lava le falepuipui ma le tulaga o polokalame nei ina ia toe fuatai ai le ola o le pagota. Aua o le upu moni lava, e pei e foliga ua faailoga e tatou tagata nei o tagata leaga e le toe lelei, a o le mafuaaga lena o le fai o polokalame na, ina ia liua ai le leaga i le lelei. O le tulaga lena ina ia mafai ona faataua.

Ia, lau Afioga i le Komesina ma..., ia alo ane ai o le tai, e avatu le faafetai e tusa ai ma galuega faatino. Faafetai foi i le Pulega o le Falepuipui i le Komesina ua faamavae nei. E talitonu e aoga mea e tutupu e aoaoina ma toe faufau ai lo tatou faamoemoe lenei. Aua a na leai mea nei e tutupu, e tatou te le iloa e i ai nisi vaega e ao ona faaleleia.

Ia, faatasi ai ma le matou tatalo, o lea foi ua toe tatalo mai le Taitai o lenei Ekalesia i le lalolagi atoa, ia tatou anapopogi faatasi i le aso 14 ina ia mafai ona talosia ai foi le faamai e pei ona feagai ai nei le lalolagi. Fai mai le Alii e ala i lana saunoaga, “O Au le Alii ua noatia au pe a outou faia le mea ua ou fai atu ai, ae a outou le faia le mea ou te fai atu ai, ua leai se folafolaga.” E faaiu atu ai ma le faamatalaga a lenei itumalo, faafetai i lau Afioga i le Fofoga Fetalai, ia tatou maua se Eseta manuia ma tatou tatalo lemu lava i le fale ia taumamao le faamai ma tatou.

Ia o le tala atu lea ma le sao o lenei itumalo, aemaise si ou itumalo o lo o faafofoga mai, aua tou te popole, o lea lava e faatumauina i latou, aemaise

o Lefaga ma Faleaseela, aua pei o itumalo nei o matou o la e toatele ai lava le aufaigaluega i uta. Ia manuia le galuega o lo o feagai ma le malu o le Malo ma lau susuga i le Komesina aemaise i latou o lo o nafa ma le tatou falepuipui, ae ola le leo i le alofa ma le agalelei o le Atua. Faafetai.

**FOFOGA FETALAI:** Malo faafetai i le sui usufono mo Falealili Sasae e pei ona saunoa ma faaiu mai le saunoaga.

Ma ou te tapa lau Afioga i le Minisita mo Leoleo, Falepuipui ma le Toefuataiga mo nisi o mea sa laga e sui usufono mamalu pe afai.... Tulai mai le Minisita.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai. E momoli atu foi le faafetai i sui usufono mamalu uma sa saunoa e tusa ai ma le Tulafono. O fautuaga uma ua outou tuuina mai i lenei aso o le a taitaia ai le galuega a au nei ma le Komesina, aemaise foi o le paia o le aufaigaluega a leoleo ma le falepuipui i le agai i luma. E i ai nisi o sui usufono e faapea po o le fofu lea, na o le Alii na te silafia. A o a ni suiga ma mea e fai, e mafai ona fai ma faataunuu pe a talitonu le Pulega ma e galulue e taunuu. Atonu o fautuaga i lenei aso ma le tatou Fonotaga e talitonu o lo o tusitusi uma e le Afioga i le Komesina aemaise foi o au nei fautuaga matagofie ua mafai ona aumai. E oo foi i le starting salary a leoleo, o lo o maualuga Tafaigata i lo i, o Tafaigata e 140 leoleo, o i i le Ofisa o Leoleo, masalo e 600 i le 700 le aufaigaluega. Ia se i ma galulue ai ma le Komesina o lo o faafogafoga mai, ae tatau lava ona tutusa tulaga ia.

O isi fautuaga, e talitonu... faafetai foi e le o Palemia le sui usufono mo Vaimauga, o lona uiga ua uma na tutuli uma le nofoaiga a Minisita. Ae i le tulaga lava ia i le faatinoga o galuega, e matua tele lava le fatu o le sui usufono mo le Vaa o Fonoti e faatino ai galuega uma lava. O le mea foi lenei e ta ai le 3 o ou i o i le po sa tupu ai le faalavelave, matou ma Komesina. Sa i ai lava le fuafuaga a le Matagaluega o Falepuipui e savalia alaafaga o lo o lata ane i le siosiomaga o Tanumalala i se taimi o i luma aua le fesoasoani atu i le faamoemoe pe a i ai ni mea e tutupu mai. E momoli atu ai foi le faafetai ia Lefaga e tusa ai foi ma le fesoasoani mai i lea po i Komesina uma e lua ma o matou tagata sa matou galulue ai i le vave ona toe maua mai o e sa sosola i tua. E momoli atu ai la le faafetai i alaafaga uma ia, ae o le a savalia lava e le Matagaluega i se taimi o i luma afioaga uma o lo o siosiomia ai Tanumalala aua le tapa o le fesoasoani a alii ma faipule, o i latou ia e tele le galuega e fesoasoani mai i le galuega tau leoleo.

Faafetai i lau Afioga i le Fofoga Fetalai.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Falepuipui ma le Toefuataiga 2020 i lona faitauga faalua.*

**TULAFONO TAU FAAOFI O TEUTEUGA O LE TULAFONO O  
FALEPUIPUI MA LE TOEFUATAIGA 2020 – iloiloga auiliili**

**FOFOGA FETALAI:** O le a sagai atu loa le Fono Aoao i le iloiloina auiliili o le Tulafono Tau Faaofi o Teuteuga o le Tulafono o Falepuipui ma le Toefuataiga 2020.

E tusa ai ma Tulafono Tumau e amata le iloiloga auiliili i le fuaiupu 2.

**FUAIUPU 2: Ua teuteuina le fuaiupu 2.**

*Faamaonia.*

**FUAIUPU 3: Ua teuteuina le fuaiupu 4.**

*Faamaonia.*

**FUAIUPU 4: Ua suia le fuaiupu 5.**

*Faamaonia.*

**FUAIUPU 5: Ua teuteuina le fuaiupu 6.**

*Faamaonia.*

**FUAIUPU 6: Ua teuteuina le fuaiupu 7 ma le fuaiupu 8.**

*Faamaonia.*

**FUAIUPU 7: Ua teuteuina le fuaiupu 13.**

*Faamaonia.*

**FUAIUPU 8: Ua teuteuina le fuaiupu 17.**

*Faamaonia.*

**FUAIUPU 9: Ua teuteuina le fuaiupu 18.**

*Faamaonia.*

**FUAIUPU 10: Ua teuteuina le fuaiupu 43.**

*Faamaonia.*

**FUAIUPU 11: Ua soloia le fuaiupu 45.**

*Faamaonia.*

**FUAIUPU 12: Ua suia le fuaiupu 58.**

*Faamaonia.*

**FUAIUPU 13: Ua teuteuina le fuaiupu 62.**

*Faamaonia.*

**FUAIUPU 14: Teuteuga faatupulaia.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o Falepuipui ma le Toefuataiga 2020.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Falepuipui ma le Toefuataiga 2020 e aunoa ma se Teuteuga.*

**TULAFONO TAU FAAOFI O LE FAATATAUINA O TUPE  
FAAOPOOPO (NU.2) 2019/2020 – faitauga faatolu**

**FOFOGA FETALAI:** Tulai mai le Afioga i le Minisita o Tupe.

**Afioga Hon SILI EPA TUIOTI:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.2) 2019/2020 i lona faitauga faatolu.*

*Faaluaina e le Minisita mo Tupe Maua, Minisita mo Aoga, Taaloga ma Aganuu ma le Minisita mo Faamasinoga ma Pulega tau Faamasinoga.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaio Faitulafono.*

**TULAFONO TAU FAAOFI O TEUTEUGA O LE TULAFONO O  
FALEPUIPUI MA LE TOEFUATAIGA 2020 – faitauga faatolu**

**FOFOGA FETALAI:** Tulai mai lau Afioga i le Minisita o Leoleo, Falepuipui ma le Toefuataiga.

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau*

*Faaofi o Teuteuga o le Tulafono o Falepuipui ma le Toefuataiga 2020 i lona faitauga faatolu.*

*Faaluaina e le Minisita mo le Soifua Maloloina, Minisita o Tupe ma le Minisita mo Aoga, Taaloga ma Aganuu.*

*Na faamaonia le lafo ma faitauina le Tulafono tau Faaofi i lona faitauga faatolu ma faapea ona pasia le Fono Aoaio Faitulafono.*

**FOFOGA FETALAI:** Ia, malo galulue, faafetai le onosai. Ou te tapa ma le faaaloalo lau Afioga i le Taitai o le Malo mo sau saunoaga.

### **SAUNOAGA A LE PALEMIA MA LE LAFO MO LE TOLOPOINA**

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai ua tatou taunuu mai nei i le faaiuga o felafolafoaiga a le Palemene i luga o mataupu sa fuafua mo le aso, na mafua ai ona valaauina le Fono faafuasei lenei faanatinati e le i ai i totonu o le polokalameina o tatou Fonotaga ua uma ona pasia e le Maota, ae ua le maalofia le vave tapa o le Fono leni faapitoa mo vaega e lua, o se faamamaavega mo le taimi nei mo le tatou atunuu, a o feagai ai ma faamai po o tapenaga a lo tatou atunuu e faasagatau atu ai i le faamai o le Koviti 19. Ma le vaega lua, ina ia faatino fuafuaga sa faavae i luga o le tatou Poloaiga o Faalavelave Faafuasei na tuufaatasia ai Matagaluega nei e lua, lea ua mafai ona faatino lava teuteuga o le Tulafono ina ia faataunuu ai lea faamoemoe lelei.

Ia, ma ou te momoli atu le faafetai i lau Afioga i le faafoeina o le tatou Fonotaga. E le gata foi i lea a o Afioga i sui usufono mamalu o le Palemene i lo outou tali mai i le faatalaauula se i tatou tauaofia i le aso nei, ua atagia ai le faataua e a outou Afioga o tofiga na tatou tauto ai. E i ai fonotaga a isi Malo sa ou vaavaai i ai, na valaau foi mo tulaga faapenei i se tali atu i le Koviti 19, sa ou matauina ai le toagaogao o fonotaga ua fefefe faipule e auai, a o leni ua matauina ma le agaga fiafia le atoa ai o le Palemene i le aso, e atagia ai le agaga naunau o a outou Afioga o tootoo o itumalo o Samoa atoa e tatou te galulue faatasi mo fuafuaga auiluma e tali atu ai i luitau o feagai ma lo tatou atunuu. Ma o le mea moni lau Afioga, e le i ataata mai lava se tulaga e matua maoti ai ma manino le faaiuga o le faamai leni. O lea foi e taumate pe ono maua vave se vailaau po o le togafitiga e agai tonu lava i le tapeina o le siama leni. O lona uiga la, o fuafuaga o lo o fai nei, ua na o ni fuafuaga mo le taimi nei, a o lea foi ua taoto le faamoemoe o le Malo i le isi fonotaga lea po o isi fonotaga ia o i

luma ona e le o toe mamao ona tatou tauaofia lea i le Maota nei i fuafuaga mo le faamaonia o le Tala o le Tupe Autu e faafoe ai le Malo o le atunuu mo le tausaga fou, lea e valaau i le faaiuga o Me mo le tauaofiaga a le Palemene i le masina o Iuni. O a nisi faaletonu e tulai mai, o le a agai i ai le Malo ma le Palemene lenei i masina ia e totoe o le faaiuga o le tausaga faaletupe o lenei tausaga.

Ae momoli atu le faamalo e tusa ai ma faaiuga ua tatou faia i lenei taeao. Ia, ma e momoli foi le faamalo i le tapuaiga a Samoa i ona tulaga faalupea, aemaise talosaga molia a i latou o auaua a le Atua o lo o talafaauto i le tatou atunuu i le tauasuina o le ipuvai o le soifua faaleagaga o le tatou atunuu, aemaise o le tatou alofaiva i lenei vaiaso e faamanatu ai le maliu ma le toetu o le tatou Faaola, o le vaiaso paia. O lea e fono i le aso le Kapeneta ma toe tilotilo i ai i nisi foi teuteuga e ono toe faia, a o le mea e sili ona faataua, o le puipuiga lea o le tatou soifua, lea ua tatou vaavaai i le matautia o le faamai i atunuu i fafo, ma ua oo lava i taitai o Ekalesia ma taitai o Malo ua latou matua faatauaina le nonofo i fale ina ia puipuia ai i latou mai le feaveai o le faamai. Ma e le o taofia foi talosaga o lo o faapea lava ona faataunuu i totonu lava o fale o aiga, ma faaoga i ai fesootaiga televavave e mafai ai ona lolotu tagata lotu ma le latou faifeau i le sauniga mai e le faifeau o tatalo ma talosaga ae lolotu atu i aiga lana aulotu. E le faapea e tuuina ai i lalo lo tatou olaga faatuatua. A o le musumusuga ua aumai i le aufailotu a le lalolagi, ia tatou tatalo mai totonu o tatou fale ma puipuia o tatou ola. A fia ola umi, nonofo i totonu o fale ma faatino mai ai o tatou tiute i lo tatou Atua.

Lau Afioga i le Fofoga Fetalai, o le faafetai lena, faafetai tele lava i le tapuaiga a Samoa, aemaise le nofo tatalo a le aufaigaluega paia, e faapea foi le mamalu o alii ma faipule, o i latou ia o lo o feagai ma le tausiga ma le puipuiga o le filemu i totonu o tatou afioaga taitasi. A o lea o le a tatou agai atu i lenei vaiaso o le Eseta, ia manuia tele lava le Eseta i lo tatou atunuu atoa ma Ekalesia.

Ou te manatu lau Afioga i le Fofoga Fetalai ma le mamalu o le Maota, ona o lo o i ai nisi mataupu taua e moomia le faia i ai o se faaiuga a le Fono Aoao, aemaise teuteuga o le Tulafono o Faiga Palota, ou te faatu ai le lafo, *Ina ia tolopo nei Taulumaga o le Fono Aoao seia aulia le aso 28 o le masina nei.*

*Faaluaina e le Sui Palemia ma le Minisita mo Pisinisi, Alamanuia ma Leipa.*

*Na faamaonia le lafo.*

**FOFOGA FETALAI:** Ua logo faafofoga Samoa i le saunoaga a lau Afioga i le Taitai o le Atunuu, le Taitai o le Malo, ua faapena foi ona logo i



tino matagi lelei ma ua sausaufialele le manu nai Utufiu, ma ua pati taoto foi le Feepo ina ua faapena ona ta tagata Leatiogie, e a upu e fai i taaloga. Malo fai o le faiva pei o le fetalaiga i Atua. Ua se togi le seuga lagatila ua faapulou i le tualima, faamalo le galulue, faamalo le fai o le faiva. O lea ua faaiuina ma le manuia le tatou Fonotaga i lenei aso, e le o po se lilo i le faafofoga tapuai mai a le atunuu, e amata mai i le Ao o le Malo, le Sui o le Fono a Sui Tofia, e oo lava i le aufaigaluega tofofi a le Atua ma le ao sinasina o le talalelei e oo lava i alo ma fanau le latou tapuaiga, ona e tau faaofiofi e le tatou fonotaga aua mataupu e fitoitonu mo lenei taimi i le utiuti ma le matautia o le faamai e pei ona feagai ai ma le lalolagi aemaise foi si o tatou atunuu. O le mea lea malo faafetai matou te le selu atu, e avea le leo o le Fofoga Fetalaia e fai ma sui o le Palemene i lau Afioga i le Palemia ma lau Kapeneta, e leai, e fai le Fono a le Palemene e vasai, a o le galuega ma le faatinoga o tiute a le Kapeneta ma lau Afioga i le Palemia faapea foi Ofisa Sili o Pulega o Matagaluega ma Faalapotopotoga a le Malo, o lo o outou galulue i le ao ma le po, po ma le ao, e le faigofie le pitolaau ma le faatinoga o le puipuiga o Samoa. E pei lava o le saunoaga a le sui usufono mo Anoamaa Sisifo le Fetalaiga i le Matua ia Lauofo, o le faamai e leai se tuaoi, e le faatuaioia foi le tagata matua ma le tagata laititi. E le faatuaioia foi le taualoa ma le le taualoa e faapea foi le maumea ma le le maumaea, atamai ma le le atamai, o le mativa ma le le tagolima, e le faatuaioia. A ua outou galulue i le ao ma le po e saili fofo ma saili togafiti.

Ia e matauina foi o Amerika o le atunuu tele e saili i ai le tofa ma auupega ma le malosi i le tamaoaiga, ua manatu o lo o faatamala i le tapenaga o aso faapenei. E le tuuaiina, ae o le matau faalogologo e le tau laeia pe tau selu atu, pe tau faafuluina foi, ae malo le alofa i le atunuu. Malo le alofa i le atunuu. O ai a amatamea? E amatamea lau Afioga, leaga o oe o le Taitai o le atunuu, aua a vale tuulima, e tuuaiina foi lau Afioga ma le Kapeneta. O le mea la lea, ia sagai ane ai o le tai ia faapena ona tapue faalautoto lou malosi, aemaise o le soifua lagolago o le Kapeneta, ae a le auunaga a Ofisa Sili o Pulega o Matagaluega ma Faalapotopotoga ma i latou uma o lo o faapena ona togimaa e saili se togafiti, tatou saili vaifofo ae faalagolago i le Atua mea uma. O le matou talitonuga lea, o lo o tui mai foi le mulipapaga e le aufaitatalo ma le aufailotu, tatalo i le ao ma le po, po ma le ao ina ia malupuipua Samoa, ma e tulagaese. Le Pasefika atoa, o la e ua maua ai le au maliliu, a o tatou, o lenei lava e le o iloa pe i ai se isi ua maua ai. Aisea? O le alofa lena o le Atua. Ia o le matou tala lea e talifuaitau i le saunoaga a lau Afioga. Ua ou manatu, ua lava ma totoe le saunoaga a lau Afioga aua le faafofoga mai a Samoa. Ae na ona matou fonofaapipii leaga e fai ma leo o le Palemene e talifuaitau i galuega fai a le Kapeneta ma lau Afioga i le Taitai aemaise o Ofisa Sili o Pulega o Matagaluega ma Faalapotopotoga a le Malo.

Ona i ai lea o le manatu, ae tatou te le i tolopo, o le a ou faaiuina le tatou Fonotaga i se tatalo.

*Na tolopo Taulumaga a le Fono Aoao Faitulafono i le itula e 1:00 i le afiafi seia aulia le Aso Lua, 28 o Aperila i le itula e 9:00 i le taeao.*